

RÁ MŪDI RA CORINTIO RÁ MŪDI CARTA RA APOSTOL NSAN PABLO BI 'YOPABI YA GAMFRI ME CORINTO

Ra apostol Pablo opabi ya gamfri me Corinto

¹ Nugui drá Pablo, Ajuá go rá paha'a pa bi zoncagui pa drá apostolgui ma zi Hmuh_u ra Jesucristo. Nugui ne ra cu Soste dí op'a'ihe nuna ra carta,

² nú'ah_u gyá gamfrih_u guí 'buh_u Corinto. Nu'ah_u bi zohn'ah_u Ajuá pa gá camfrih_u ma zi Hmuh_u ra Jesucristo, ne bi 'uec'ah_u de ja ya ts'oqui pa go gui pɛpabih_u'a, ne bi t'axca ri mfenih_u mahyɛgui con gatho nú'uh_u 'b_u hab_uraza ri xɔcambeni'a. Nú'a ma zi Hmuh_u drí xɔcambeni_u go guet'a ri xɔcambeni nehe'uh_u.

³ Ajuá ma Dadah_u ne ma zi Hmuh_u ra Jesucristo da jap'a'ih_u ne da max'ah_u pa gui 'buh_u te rá 'ñentho.

Ya japi xa thani po ra Zidada Jesucristo

⁴ Nzantho dí umba njamadi Ajuá por gue'ah_u, ngue'a nu'a co rá hñoja'i xa pøhø'ih_u po ra Zidada Jesucristo.

⁵ Ajuá xa jap'a'ih_u ndunthi ngue'a xcá camfrih_u ra Zidada Jesucristo, hangue xa 'ra'ah_u ra ts'edi pa guí ñah_u de rá noya'a, ne xa 'ra'ah_u ndunthi rá hoga mfadi'a nehe.

⁶ Nubya ri hnequi gue xcá camfrih_u xá hño gatho nú'a dá xi'ahe de ra Zidada Jesucristo.

⁷ Hangue nubyá hinte grí 'bɛhɯ de gatho ya hoga japi nú'ɯ ri 'racjɯ Ajuá, ne guí tɔ'mhɯ nú'á ra pa stua yopa pengui ma Zidadahɯ ra Jesucristo.

⁸ Nú'á go gue'á ma da su'a'ihɯ asta ra pa'á rá gats'i ri tehɯ de guecua ja ra ximhai, pa hinda za to da mā gue nu'ahɯ guí tuhɯ ra ts'oqui nu stua yopa penga ma Zidadahɯ ra Jesucristo.

⁹ Ajuá nzantho øt'a gatho nú'á xa mā, y nú'á go gue'á xa huahn'ahɯ pa gui 'bɯhɯ co ma zi Hmuhɯ ra Jesucristo rá T'ɯ'á.

Ya gamfri 'rama'na'ño beni

¹⁰ Zi cuhɯ dí bante'ihɯ de rá thuhu ma Zidadahɯ ra Jesucristo gue da 'nat'a gui mañhɯ, pa da 'ñotho ya hegue de gue'ahɯ. Nu'á gui 'yøthɯ, 'bɯhɯ mahyɛgui co 'nada ra mfeni ne 'nada ra jamfri.

¹¹ Dí xi'ahɯ njabɯ ma zi cu'ihɯ ngue'á xa xicagui nú'ɯ ja te yá njauí ra nju Cloé gue ja ra ora grí ntunɛhɯ.

¹² Dí xi'ahɯ njabɯ ngue'á 'ra de gue'ahɯ guí mañhɯ njaua: “Nugui drí dɛna ra cu Pablo”, ha nu ma'ra guí eñhɯ: “Nugui drí dɛna ra cu Polo”, y nu ma'ra guí eñhɯ: “Nugui drí dɛna ra cu Pedro”, ha nu ma'ra guí eñhɯ: “Nugui drí dɛna ra Zidada Jesucristo.”

¹³ ¿Ha gue hingue gatho'ihɯ guí dɛnhɯ ra Zidada Jesucristo? ¿Ha gue bi du ja ra pont'i ra Pablo po rá ngue'a'ihɯ? ¿Ha gue xcá nxistehehɯ de ja rá thuhu ra Pablo? Hina.

¹⁴ Dí umba njamađi Ajuá gue nugui hønɛ ra cu Crispo ne ra cu Gayo stá xi'tsi de gue'ahɯ, y hinto ma'na stá xi'tsi.

¹⁵ Hangue hinda za gui mañhɯ gue xcá nxistehehɯ de ma thuhuga.

16 Nehe dá xi'tsa nú'ᵤ ya mengu de ja rá ngu ra cu Teba. Pe de guehni hinstá xi'tsa ma'ra.

17 Ra Zidada Jesucristo himbá pencagui pa ga øt'a ra sistehe, nu'á bá pencagui pa ga m̄anga ra m̄aca noya. Pe hindí m̄a co 'raya noya xi mahotho nú'ᵤ de ma mf̄adisε, pa hinda t'ena gue xi ja ma mf̄adi ne da gamfri ya ja'i h̄onse co ma hoga noya. Nugui dí ne da gamfri'ᵤ h̄onse po nú'a ra du bi thogui ra Zidada Jesucristo ja ra pont'i.

Ra ts'edi ne ra mf̄adi de Ajuā go ma zi Hmuhᵤ ra Jesucristo bi 'ñutcahᵤ

18 Nujú dí mañhᵤ gue bi du ra Zidada Jesu ja ra pont'i pa ga mp̄øhøhᵤ, ha nu'ᵤ tó'o hingui camfri'a ma da 'm̄edi'ᵤ ngue'a mañ'ᵤ gue hinte ri muui nú'a dí mañhᵤ de rá du ra Zidada Jesucristo. Pe pa nújᵤ stá mp̄øhøhᵤ ri muui, ngue'a go gue'a hanpa rá ts'edi Ajuā.

19 M̄anga njaua ja ra M̄aca T'ofó:
Ma ga huatuabi yá mf̄adi ya b̄amhya,
ne ga haçuabi yá mfeni ya nimfeni.

20 ¿To'ó nú'a ra bahmyabya? O ¿to'ó nú'a xi ja rá mf̄adi? Ne ¿to'ó nú'a pađi gatho te ja mapaya? Jo'ó, ngue'a ja rá thandi Ajuā hinte ri muui yá mf̄adi ya ja'i.

21 Ngue'a ya ja'i masque xi ja yá mf̄adi, hinxa za hanja da bađi'ᵤ Ajuā. Pe Ajuā rá paha'a da p̄øhø nú'ᵤ to'ó da gamfri nú'a ra noya dí mañhᵤ, masque nú'ᵤ ya b̄amhya ena gue hinte ri muui nú'a dí mañhᵤ. Pe Ajuā xi ja rá mf̄adi hangue bi 'yøt'a njabᵤ.

22 Ya xodyo nzantho adi da t'utua 'nara nt'udi, y nuya griego h̄onse ra mf̄adi honi,

23 pe nu_ɣ dí mañh_ɣ de ra Zidada Jesucristo nú'a bi tho ja ra pont'i. Y guehna 'nara mfe'tse pa ya xodyo, ne nú'ɣ hingyá xodyo ena gue hinte ri muui nú'a dí mañh_ɣ de rá du ra Zidada Jesucristo.

24 Pe nú_ɣ xa huancah_ɣ Aju_ɔ, gue dyá xodyoh_ɣ gue hindyá xodyoh_ɣ, gathoguih_ɣ dí p_ɔh_ɣ gue ma zi Hmuh_ɣ ra Jesucristo bi hñanpa rá ts'edi ne rá mfadi Aju_ɔ pa bi pøhøguih_ɣ.

25 Aju_ɔ ma'na ja rá mfadi ne ma'na ja rá ts'edi de gatho ya ja'i, masque eñ'ɣ gue hinte ri muui nú'a ra du bi thogui ra Zidada Jesucristo ja ra pont'i.

26 Zi cuh_ɣ, p_ɔh_ɣ gue nu'ah_ɣ xa huahn'ah_ɣ Aju_ɔ, masque hinga ndunthi de gue'ah_ɣ guí pɛ'tsh_ɣ ra mfadi de ra ximhai, ne hinga ndunthi de gue'ah_ɣ guí h_ɔh_ɣ ra ts'utbi, y ne hinga ndunthi de gue'ah_ɣ guí pɛ'tsh_ɣ 'nara dang_ɔ nsu.

27 Aju_ɔ bi huahna nú'ɣ hinte yá fadi de guecua ja ra ximhai pa da 'betuabi yá tsa ya bamhya. Aju_ɔ bi huahna nú'ɣ hingui h_ɔ ra ts'ediua ja ra ximhai pa da 'betuabi yá tsa nú'ɣ h_ɔ ra ts'edibya.

28 Aju_ɔ bi huahna nú'ɣ hinte ri muui ja ra ximhai ne nú'ɣ xi ya t'utsa, ne nú'ɣ to'o ni ts'ɣ yá nsu otho, pa da 'betua yá tsa nú'ɣ to'o pɛ'tsa yá nsu,

29 pa njab_ɣ hinto da 'ñets'i ja rá thandi Aju_ɔ.

30 Aju_ɔ go gue'a bi 'yøt'e pa dá 'nathoh_ɣ co ra Zidada Jesucristo, ngue'a nuse Aju_ɔ go gue'a bá pɛhni'a pa bi 'ñutcah_ɣ rá mfadi Aju_ɔ, ne bi hñasca ma ts'oquih_ɣ, ne bi t'axca ma mfenih_ɣ pa bi za dá 'b_ɣh_ɣ xá hño ja rá thandi Aju_ɔ.

31 Aju_ɔ bi 'yøt'e njab_ɣ pa da nja ngu nú'a xa nt'of_ɔ ja ra Maça T'of_ɔ hab_ɣ ena: “Nu'a tó'o ne da 'ñets'i, dá 'ñets'i, pe de nú'a xa 'yøt'a Aju_ɔ, hingue

de nú'a xa 'yøt'ase.”

2

Ra apostol Pablo bi ma de ra Zidada Jesucristo ne de rá du

¹ Zi cuh_u, nugui nu ndá mab_u pa dá zo'ah_u de rá noya Aju_a, hindá zo'ah_u co 'raya danga noya xá hñei, nixi co ndunthi ra mfadi de guecs_eh_e.

² Pe nu de nduá 'b_up_u, dá ja dá zo'ah_u hønse de ma Zidadah_u ra Jesucristo nú'a bri pont'a ja ra pont'i ne bi tho, ne hindá zo'ah_u de ma'na ra noya.

³ Nu ndá zo'ah_u mi otho ma ts'edis_e, ne mi 'racagui ndunthi ra ntsu pa ga ñ_a, asta ndrí huat'i.

⁴ Hindá ne dá zo'ah_u co ra mfadi de ra ximhai pa gá camfrih_u, nugui dá zo'ah_u co rá ts'edi ra Maça Ndahi.

⁵ Dá zo'ah_u njab_u pa bi za gá camfrih_u co rá ts'edi ra Maça Ndahi, hingue ngue'a gá 'yødeh_u yá mfadi ya ja'i.

Aju_a utcaguih_u tengu rá 'm_ui'a co rá ts'edi ra Maça Ndahi

⁶ Nú'u to'o xa ze yá jamfri dí zofoh_e co ra mfadi pe nura mfadi'a go bra 'ñehe de Aju_a, hingue de ra ximhai, nixi de yá mfadi ya nda nú'u ma da uadi da thogui.

⁷ Dí mañhe de nú'a bi 'yøt'a Aju_a pa bi za dá mpøhøh_u ne ga tsøñh_u ja rá nsunda'a. Y nú'a dí mañhe go gue'a ra hoga mfadi xqui beni Aju_a desde ante da nja ra ximhai, ne himi fadihma, pe nubyá ya xa 'ñutcah_u.

⁸ Ni 'na de nuya nda de ja ra ximhai himbi badi nuna ra mfadi xa 'racj_u Aju_a, ngue'a nu'b_u xa

bađi'ɥ, hinxa hyohma ja ra pont'i numa Zidadahɥ xá nsunda.

⁹ Bi nja ngu nú'a xqui t'ofó ja ra Maça T'ofó habɥ ena:

Ni 'nara ja'i himbi za bi hyandi, nixi bi 'yøde, nixi bi zo rá mfeni tengu rá 'mɥi de ja rá ñani Ajuá, ne hinto xa bađi gathó nú'ɥ ya jaپی xa beni da umbabi nú'ɥ to'o ri mađi'a.

¹⁰ Y nujá, Ajuá bi 'ñutcağuihɥ gathó nuya t'øt'eya po rá ts'edi ra Maça Nđahi, ngue'a nura Maça Nđahi go gue'a pađi xá hño gathó, ne asta pađi gathó nú'a te benga Ajuá.

¹¹ Ni 'nara ja'i hingui tsa da batua rá mfeni ma'na rá miqu'eiui, ngue'a cada 'na go pađise tengu rá mfeni. Njabatho nehe ni 'na hinto patua rá mfeni Ajuá. Nura Maça Nđahi ha, go gue'a patuabi rá mfeni Ajuá.

¹² Y nura Maça Nđahi'a xuá mencahɥ pa da 'ñutcahɥ gathó nuya hño ri 'racjɥ'a, y hingo dí hamfɥ rá mfađi ra ximhai pa ga pahɥ nuya hño'ɥ.

¹³ Nuje dí udihe ngu nú'a utcahe ra Maça Nđahi, hindí udihe co ma mfađisehe. Nú'ɥ to'o pe'tsa ra Maça Nđahi ja yá coraso, dí utuabihe co ya noya nú'ɥ 'racaguihe ra Maça Nđahi.

¹⁴ Pe nú'a ra ja'i hinxa gamfri Ajuá hingui hani nú'a udi rá Maça Nđahi Ajuá, ngue'a beni'a gue hinte ri muui. Ne hingui tsa da bađise'a, ngue'a mahyoni go da 'ñutuabi ra Maça Nđahi pa da za da bađi'a.

¹⁵ Pe nu'a tó'o xa gamfri Ajuá ne pe'tsa ra Maça Nđahi ja rá coraso, nú'a ha, pađi xá hño gathó nú'ɥ ya nt'udi'ɥ, ne pađi nda'a ra hño y nda'a ra 'ñɥ. Pe

nu'a tó'o hingui pe'tsa ra Maça Ndahi, hingui tsa da xipabi te gra 'm̄ai'a.

¹⁶ Enga ja ra Maça T'ofó: ¿To ja gue'a xa batuabi rá mfeni ra Zidada? O ¿to ja gue'a xa za xa 'ñutuabi te da 'yøt'e'a? Jo'ó. Pe nujabya h̄a, dí patuah̄a rá mfeni ma Zidadah̄a ra Jesucristo.

3

Ra apostol Pablo ne ra Apolo mahyεgui yá m̄efi Ajuá

¹ Zi cuh̄a, dá zo'ah̄a ngu ts'ofó nú'̄u hints'̄u xa ze yá jamfri, ngu ya t'ub̄atsi hinte yá faditho, ngue'a himbi za dá zo'ah̄a ngu 'raya cu nú'̄u pađi xá h̄ño nú'̄u ya nt'udi udi ra Maça Ndahi.

² Dá zo'ah̄a 'ramats'̄u ngu 'raya zi b̄atsi nú'̄u ts̄atho, ngue'a himbi za dá xi'ah̄a ya noya xá h̄ñei, ngue'a mi otho ndunthi ri mf̄adih̄a, y asta nubya hinxa za stá xi'ah̄a gatho.

³ Ngue'a nu'ah̄a guí øt'athoh̄a ngu nú'a øt'a nú'̄u hingyá gamfri, ngue'a gyá ndusteh̄a, ne gyá necatsuih̄a, ne gyá necatuhn̄ih̄a. Hangue por gue'a hinxcá 'ueguethoh̄a de ja ya ts'oqui, ngue'a guí 'yoh̄a ngu nú'̄u hinxa gamfri Ajuá.

⁴ 'Ra de gue'ah̄a guí eñh̄a: “Nugui drí đena ra cu Pablo”, ha nu ma'ra guí eñh̄a: “Nugui drí đena ra cu Polo”. Xi de guí mañh̄a njab̄a, ¿ha gue hinguí øth̄a ngu nú'̄u ya ja'i hingyá gamfri?

⁵ Xi ¿te ma 'b̄efi dí p̄efi? Y ¿te ma 'b̄efi p̄efi ra cu Polo? Nugui ne ra cu Polo dyá 'b̄εgothohe de Ajuá, ne go guecaguihe dá zo'ahe pa gá camfrih̄a'a. Nugui ne ra cu Polo, cada 'na de guecje dí p̄efihe ra 'b̄efi xa 'racaguihe Ajuá.

6 Nugui go rá mudi dá zo'ahũ de rá noya Ajuã, ha nura cu Polo go xa su'a'ihũ asta nubya, pe nu'ã tó'o xa 'ra'ahũ ra jamfri, go guesẽe Ajuã.

7 Hanguê ni guequi ni ra cu Polo hinda za te ga pẽhe de guecẽhe. Nu Ajuã go gue'ã ja rá ts'edi pa xa japi xa te ri jamfrihũ.

8 Hanguê guí njahũ ngu 'nara huãhi habũ stá mpẽhe, nugui go stá pot'i, ra cu Polo go xa 'ñunthe. Hanguê ngu ra mot'i ne ra 'ñunthe, Ajuã ma da gutcahe ngu nú'ã stá pẽfihe.

9 Nuje dyá mẽfihe de Ajuã, ha nu'ahũ guí njahũ ngu 'nara huãhi habũ ri mpẽfi'ã.

Ne guí njahũ ngu 'narã hoga ngu Ajuã ri jũ'tsuabi.

10 Nugui go dí nja ngu 'nara hoga hyocangu dá jũ'tsua rá ua ra ngu, gue'ã ra 'bẽfi bi 'racagui Ajuã, ha nu ma'na go jũxa ra jãdo. Pe cada 'na mahyoni da jamasu nú'ã pẽfi.

11 Ngue'ã otho ma'na ra cimientto da za dra jũts'i, hõnse nú'ã ya ja, y nura cimientto'ã go guesẽ ma zi Hmuhũ ra Jesucristo.

12 'Bũ to'o da gũts'i de maña nú'ã ra cimientto ya ja, pẽ'tsi da beni xá hño ua da gũts'i dega oro o dega t'axi o dega hoga do, o ua da gũts'i dega za o dega xot'o o dega xithi.

13 Cada 'na de ya gamfri ma da hnequi rá 'bẽfi'ã, ngue'ã nú'ã ra pa de ra nsuca uenda gue'bũ ma da fãdi tengu rá 'bẽfi cada 'na. Nú'ã ra pa'ã ma da nzø ra tsibi, y nuni ja ra tsibi ja ma dra tsapabini rá 'bẽfi cada 'na nú'ã xa mẽfi.

14 'Bũ 'na to'o bi hoca rá 'bẽfi maña de ra cimientto ne hinda zat'a nurá 'bẽfi'ã, nu'bú nú'ã to'o bi hoca nura 'bẽfi'ã ma da hñanga rá thãhã.

15 Pe nu'bu 'na xa mpefi ne nurá 'befi'a ma da zat'i, nu'bu hinda ma da t'umbabi rá thaha. Hinte ma da hñani, ngue'a bi zat'a nú'a xqui mēfi, pe nu'á ma da mpøhø, nja ngu nú'a to'o bi tho ra nzat'i ne bi 'bedi gatho nú'a xqui mēfi.

16 ¿Ha gue hinguí pah gue nu'ahu go gue'ahu rá nija'ihu Ajuá, y nurá Maça Ndahi'a 'bui ja ri corasoh?

17 'Bu 'na to'o da huatua rá nija Ajuá, nu'bu Ajuá da huati'a nehe, ngue'a rá nija Ajuá xi xá nsunda. Ne go gue'a'ihu nurá nija'a.

18 Osti ma da hya'ahu ri mfenihu gue gyá bahmyahu. 'Bu 'na de gue'ahu guí beñhu gue xi guí pē'tshu ra mfaði, y nu'bu nura mfaði'a go de nuna ximhai, 'yøthu ra uenda gue 'besthó hinte guí pah, pa njabu ha, da za gui pē'tshu nú'a xi ra hoga mfaði brí 'ñehe de Ajuá.

19 Ngue'a pa ja rá thandi Ajuá 'besthó hinte ri muui nú'a ra mfaði de ra ximhai. Hangu engu ja ra Maça T'ofu: “Ajuá xi patuatho yá mfeni ya bamhya de ra ximhai gue nu'ú hatetho, hangu co yá mbamhya ri 'medise'u.”

20 Nehe xa t'ofu njaua: “Ajuá paði gue hinte ri muui nuyá mfeni ya bahmya.”

21 Hangu ogrí 'ñets'ihu guí 'ñeñhu gue grí denhu 'na o ma'na, ngue'a gatho nú'u to'o xa mpefi con gue'ahu go pa ri hñoh.

22 'Bu rá 'befi ra cu Pablo, 'bu rá 'befi ra cu Polo, 'bu rá 'befi ra cu Pedro, gatho pa ri hñoh. Nu'ahu gatho go o ja ri 'yehu pa ri hñoh, ra ximhai, ra te, ra du, gatho nú'a ja mapaya ne nú'a bra 'befa.

23 Y nu'ahu guí ohu ja rá 'ye ma zi Hmuhu ra Jesucristo, y ma zi Hmuhu ra Jesucristo go o ja rá

'yε Ajuā.

4

Nú'a bi thogui ya apostol ja yá 'bεfi

¹ Dí nehe gui pāh_u gue nuje yá mεfiguihe ra Zidada Jesucristo, ne dí udihe nú'a xa 'ñutcahe Ajuā nú'a xqui beni maya'b_u ne himi fādihmā.

² Hanguē mahyoni ga mañhe gatho nú'a xa 'ñutcahe Ajuā, ngue'a go yá mεfiguihe'a.

³ Nugui hingui tu ma mui de gatho nú'a guí mañh_u de guequi, nixi nú'a mąnga ra ts'utbi de guequi. Nixi nugaguisε hindí ena gue dí 'yo xá hño.

⁴ Masque nugui dí beni gue xá nt'axi ma mfeni, pe hingue por gue'a ma da hmā gue hinte dí tu. Nura Zidada go gue'a ma da hñābgga nguenda'a.

⁵ Hanguē ogo guí hām_f nguenda te øt'a ri miq'ueih_u, ngue'a ma dua yopa penga ma Zidadah_u ra Jesucristo, y nu'bú nú'a hā, ma da hñābgah_u nguenda. Ne nu'a go gue'a ma da japi da hnequi gatho nú'a xa t'øt'e mant'agui. Ne ma da mā gatho nú'a te xa beni ja yá mfeni ya ja'i. Y nura pa'a Ajuā ma da 'ñe'tsua rá nsu ngu rí 'ñepabi cada 'na.

⁶ Zi cuh_u, núna stá xi'ah_u stá mā de guequi ne de ra cu Polo, pa njab_u gui pāh_u nda'a rí 'ñepi gui 'yøth_u. Nuje hindrí ueñhe rá 'bεfi Ajuā. Hanguē gui njahub_u nehe hingui nueñh_u 'nara cu. Stá xi'ah_u njab_u pa gui 'yoh_u ngu mąnga ra Māca T'ofó, pa njab_u hingui 'ñe'tsua_h yá nsu 'ra, ha nu ma'ra go gui utsah_u.

⁷ ¿Hanja grí 'ñets'ih_u? Xi gatho nú'a te guí pε'tsh_u, ¿ha gue hingo xa 'ra'ah_u Ajuā? Nu'b_u go xa

'ra'ah_u'a, nu'bú ¿hanja grí 'ñets'ih_u? Njab_u ja ra uenda hingo xa 'ra'ah_u'a.

⁸ Nu'ah_u 'ñena hinte grí 'bēh_u, 'ñena ya guí pē'tsh_u gatho nú'a guí hoñh_u, ya ngu grí 'ñet'a ndāh_u, ha nuje go xcá hyεgaguiheua, 'ñena hinte drí muuihe. Xi dí nehmahe gue ya xcá ndāhmāh_u, pa njab_u ga ndāhmāh_u mahyεgui.

⁹ Nuje dyá apostolhe, dí beni gue Ajuā xa hñuxcahe ngu 'raya ja'i nú'u hinte ri muui, ne xa secuabi pa da tho ja yá thandi gatho ya ja'i ne ja yá thandi yá εnxε Ajuā.

¹⁰ Nuje t'engaguihe gue dyá 'bεmfenihe ngue'a dí pεpabihe ma zi Hmuh_u ra Jesucristo, ha nu'ah_u xcá benseh_u gue xi gyá bamhyah_u de rá noya'a. Nuje xa t'enje gue othoguihe ra ts'edi, ha nu'ah_u guí beñh_u gue xi ja ri ts'edih_u. Ne guí beñh_u gue xi t'e'ts'a ri nsuh_u, ha nuje xi dyá t'utsahe.

¹¹ Asta nubya xi dí sufrihe nts'edi, dí thohe ra thuhu ra nduthe ne ra 'ñāhe. Nabgaguihe ya ja'i, ne hindí pē'tshe 'nara ngu nú'a dua mētihe.

¹² Xi dí thohe ra nzabi pa dí hoñhe nú'a dí tsihe nehe. Nura ora dí øhe tsanje ya ja'i, nuje dí aphe Ajuā por gue'u. Y ra ora øtcahe ra nts'omai'u, gatho dí tsetathohe.

¹³ Nura ora ñama'ñ_u ya ja'i de guecje, nuje dí zofohē co ndunthi ra t'equ'ei. Pe nuje pa ja yá thandi'u dí njahe ngu ra paxi xa fōtb_u hinte ri muui, ngue'a pa gue'u xá nts'oje.

¹⁴ Hindí op'ah_u nuya ya noya pa ga 'bε't'a ri tsah_u. Dí op'ah_u pa ga zo'ah_u ngue'a pa guequi ja ra uenda ma hmāca bātsi'ih_u, ngue'a go dá xi'ah_u rá noya Ajuā.

15 Masque gri pɛ'tshu 'ret'a 'mo nú'u to'o di u't'ahu de ma zi Hmuhu ra Jesucristo, pe sehegui go rá mudi dá ha'ts'ahubu rá noya Ajuá pa gá camfrihu ma zi Hmuhu ra Jesucristo, hangue nugui ja ra uenda go drá dada de gue'ahu.

16 Hangue dí bante'ihu gui tengaguihu ma 'mui.

17 Hangue dá pehn'ahubu ra cu Timu nú'a ma hmaca t'u de ja ra jamfri, ne nu'á 'yo xá hño ja rá thandi ra Zidada. Y nu'á go gue'a ma da yopa ben'ahu tengu ma 'mui ja ra Zidada Jesucristo. Guet'atho dí udi nehe haburaza de ja ya nija.

18 Pe nu 'ra de gue'ahu xi xa ñuxa ri mfenihu dega nt'ets'i, guí hu ri muihu gue hinga ma ga yopa penguibu ga c'a'ts'a'ihu.

19 Pe nugui dí beni ga mabhu 'bestho pa ga c'a'ts'ahu ma'na'qui 'bu njabhu rá paha ma Zidadahu. Nu'bú ha, ga pađi ua xi ha ra ts'edi nú'u 'yobu ri 'ñets'i, o hønse 'yobu mantho.

20 Ngue'a nu'a tó'o da mepa Ajuá, mahyoni di hanpa rá ts'edi pa da za te da mefi, hingue da mantho.

21 ¿Nda'a guí nehhu, ga mabhu ga zo'ahu dega cuε, o ga zo'ahu dega hmate?

5

Ra nthanga nguenda de 'nara gamfri nú'a bi 'yot'ara ts'oqui

1 Xa fađi xá hño gue 'nara cu de gue'ahu xa guxa rá hømē ne 'buhui ngu rá 'behña. Pøde nixi nú'u hingyá gamfri hingui øt'a njabhu.

2 ¡Pe nu'ahu xcá pahhu ne grí 'ñets'ihu guí eñhu gue guí 'buhhu xá hño! ¡Rí 'ñep'a'ihu xa du ri muihu

h_mah_a ne ya x_{cá} hñ_{acj}h_mah_u nú'a to'o øt'a nú'a ra ts'oqui'a!

³ Nugui masque hindí 'b_{ui} con gue'ah_u, pe numa mfeni 'b_{ui} con gue'ah_u, y ja ra u_{enda} dí 'b_{ui} con gue'ah_u. Hangue nugui ya stá beni te ma ga øt'e co nú'a to'o øt'a nú'a ra ts'oqui'a.

⁴ Hangue 'yøth_u nú'a ma ga xi'ah_u. Gue da muntsh_u de rá thuhu ma Zidadah_u ra Jesucristo, y numa mfeni ma da 'm_{ui} con gue'ah_u, ne rá ts'edi ma Zidadah_u ra Jesu ma da 'm_{ui} con gue'ah_u.

⁵ Ne 'y_{ent}'uah_u ja yá 'y_e ra ts'ondahi nú'a ra cu'a øt'a nú'a ra ts'oqui'a, pa da thogui ya ts'othogui ja rá ndo'yo, pe nurá te'a da mpøhø nura pa'a stua yopa penga ma Zidadah_u.

⁶ Hanja grí 'ñets'ih_u guí eñh_u gue guí 'b_{uh}u xá hño, ha 'na de gue'ah_u øt'a nú'a ra ts'oqui'a. Ngue'a nu'á nja ngu ra levadura masque 'na zi t_{ai} pe ri ntsini gatho ja ra arina ora dra thants'i.

⁷ Hangue hñ_{acj}u nú'a ra ts'oqui'a ne gatho nú'a nguí øth_u ja ri ndaxjua 'm_{ui}h_u, pa njab_u da za guí 'b_{uh}u co 'nara 'ra'yo 'm_{ui}. Ngue'a nu'ah_u ya guí p_e'tsh_u ra 'ra'yo 'm_{ui} por ma Zidadah_u ra Jesucristo nú'a bi tho ngu 'nara zi d_eti nú'u tho de ra ngo de ra pascua, pa njab_u bi gutca ma ts'oquih_u'a.

⁸ Hangue mahyoni ga 'uegueh_u de ma ndaxjua 'm_{ui}h_u pa ga 'b_{uh}u strá nt'axiguih_u. Nja ngu ya xodyo mi øt'ango mi tsi ra thuhme nsi ra levadura, necj_u nehe ngu ga ntsamgoh_u de ra pascua ne ga tsih_u ra thuhme nsi ra levadura, nú'á gue'a ga 'uegueh_u de ya ts'oqui de ja ma mfenih_u ne de ja ma 'm_{ui}h_u.

⁹ Ja nú'a ma'na ma carta dá p_ehn'ah_{ub}u ja dá xi'ah_uni gue hingui ntsixh_u co nú'u to'o ya

'ñe'behñá, o nú'ya ya 'behñá ya 'ñedame.

¹⁰ Hingue dá xi'ahya gui 'uehya 'na'quitho de nú'ya hingyá gamfri ne ya 'ñe'behñá, o ya nduste, o ya be, o nú'ya to'o camfri ya c'oi. Nu'bya stá xi'ahya njabya, nu'byá mahyoni gui mahya de guecua ja ra ximhai.

¹¹ Pe nugui nu'á dá xi'ahya, hingui ntsixhya ni 'nara cu nú'á dra 'ñe'behñá, o dra nduste, o nú'á di camfri ya c'oi, o dra zante, o dra tixfani, o dra be. Nu'ya tó'o øt'a njabya dí xi'ahya gue hingui ho nixi gui ñuñhya con gue'ya.

¹²⁻¹³ Nujá hingo rí 'ñepi ga hã'mbahya nguenda nú'ya hingui o ja ma 'yehya, nu Ajuá go gue'á da hñá'mba nguenda'ya. Pe nu'ahya mahyoni gui hñá'mbahya nguenda nú'ya o ja ri 'yehya, hangue dí xi'ahya gue gui hñácjya nú'á to'o øt'e nú'á ra ts'oqui'a.

6

Ya gamfri ri nhyantha ja ya nzaya hingyá gamfri

¹ 'Bya 'na de gue'ahya gui pe'tshya 'nara tshí co ma'na ra cu, ¿hanja gui paha 'bestho ja ra ts'utbi pa gui ñátehya co nú'ya hingyá gamfri? ¿Ha gue hingue 'nara 'betsa'á? ¿Hanja hingo gui paha gui ñátehya ja ya cu?

² ¿Ha hingui pahya gue nújya dyá gamfrihya ma go ga hã'mbahya nguenda nú'ya hingyá gamfri? Nu'bya nújya ma ga hã'mbahya nguenda yá danga t'øt'e'ya, nu'byá ¿ha gue hingo da za ga hãñhya nguenda de nuya t'øt'e xi ya t'hyqui?

3 ¿Ha hinguí pah_u nehe gue ma ga ha'mbah_u nguenda asta ya ενχε? ¿Xihm_a de nuya t'øt'e de ra ximhai!

4 Nu'b_u nu'ah_u guí pε'tsh_u ya tsui co nuya t'øt'e de nuua ja ra ximhai, 'bestho guí paha guí ñateh_u co nú'uhingyá gamfri ne hinte dri 'ñent'i con gue'ah_u. Hingui ho njab_u ngue'a nu'ú hinguí pađi da hñ_a'mba nguenda ya cu.

5 Dí xi'ah_u njab_u pa guí 'bε ri tsah_u ne pa ya hinguí sigui guí 'yøth_u. Xi de grí gathoh_u ¿ha gue jo'o ni 'na de gue'ah_u nú'a di ja rá mfađi pa da za da hñap'ah_u nguenda de nú'a guí øth_u?

6 Ha nu'ah_u ora guí pε'tsh_u ya tsui co 'nara cu, 'bestho guí paha guí ñateh_u co nú'uhingyá gamfri.

7 Hiní 'ñep'a'ih_u guí ñapabih_u 'na ngu ma'na co nú'uhingyá gamfri. ¿Hanja hinguí tsεathoh_u nura ora t'øt'ah_u 'nara nts'o'mui, ne ora te fep'a'ih_u?

8 Pe nu'ah_u go gue'aseh_u guí ø'tuah_u ra nts'o'mui ri cuh_u, y asta guí pep_u.

9 ¿Ha gue hinguí pah_u gue ya ts'oja'i hinda ma da yut'a nuni mahets'i hab_u bí manda Aju_a? Odi ha'ah_u ri mfenih_u. Ngue'a gatho nú'uhingyá gamfri ya 'behñ_a nú'uhingyá gamfri ya 'behñ_a, ne gatho nú'uhingyá gamfri ya c'oi, ne nú'uhingyá gamfri ya zinga medinthađi, ne nú'uhingyá gamfri ya 'ñøhø ri hñuxui yá mi'ñøhøui, o ya 'behñ_a ri hñuxui yá mi'behñ_aui, gatho nú'yá hinda ma da yut'a nuni mahets'i hab_u bí manda Aju_a.

10 Nixi ya be, nixi ya nduste, nixi ya tixfani, nixi ya zante, nixi nú'uhingyá gamfri co ra nthate, ni 'na de gue'uhingyá gamfri hinda ma da yut'a nuni mahets'i hab_u bí manda Aju_a.

11 Ante guí camfrih_u Aju_a nguí njah_u nehe 'ra de gue'ah_u. Pe nubyá ya xa t'axca ri mfenih_u, ne

ya xa t'ec'a'ih_u de gatho nuya ya ts'oqui, ha nubyá ya hinte ma ts'oqui guí tuh_u ja rá thandi Ajuá po rá ts'edi ma Zidadah_u ra Jesucristo ne po rá ts'edi rá Maça Ndahi Ajuá.

Ga nsuh_u xá hño pa strá nt'axi ma ndo'yoh_u

¹² Da za ga beñh_u gue dí pe'tshmah_u ra nsequi ga øth_u nú'a go ga neh_u. Pøde hã da za, pe hingue gatho rí 'ñepi ga øth_u. Masque ja ra nsequi ga øth_u nú'a go ga neh_u, pe hinga hoph_u ni 'nara t'øt'e da dəcj_u pa ga øth_u.

¹³ Ra hñuni thoqui pa da ma mbo ra m̄i, ha nura m̄i ja pa ra hñuni. Pe gatho nú'u yoho, Ajuá ma da hñacua yá 'bɛfi'u. Numa ndo'yoh_u hinxa thoqui pa ga hñuxh_u co ya 'behñã nú'u hingue xi ma 'behñãh_u, nixi ra 'behñã hinda hñuxui ma'na ra 'ñøhø nú'a hingue xi rá dame. Numa ndo'yoh_u xa hoca Ajuá pa ga pɛpabih_u'a, y nu'á go gue'a supca ma ndo'yoh_u.

¹⁴ Nu Ajuá bi japi bi yopa nte rá ndo'yo ma Zidadah_u ra Jesucristo, njab_u nehe ma da japi da yopa nte ma ndo'yoh_u po rá ts'edi'a.

¹⁵ ¿Ha hinguí pah_u gue numa ndo'yoh_u xa 'natho co ma zi Hmuh_u ra Jesucristo ngue'a stá cam-frih_u'a? Nujá ya dí 'nathoh_u co ma zi Hmuh_u ra Jesucristo, nu'bá ¿hanja da za ga hñuxh_u co 'nara ts'o'behñã ne ga 'nathoh_u con gue'a nehe? Ni ts'u hinda za.

¹⁶ O ¿ha gue hinguí pah_u gue nu'a tó'o da hñuxui 'nara ts'o'behñã ya bi 'natho rá ndo'yo con gue'a? Ngue'a enga ja ra Maça T'ofu njaua: “Ra 'ñøhø co rá 'behñã, gue'u ya ri 'natho.”

17 Pe nu'a tó'o ya ri 'natho co ma Zidadah_u ra Jesu, ya ri 'natho con gue'a pe dega Maça Nda_{hi}.

18 Hangue oguí hñux_u co ya 'behñ_a nú'_u hingue xi ri 'behñ_{ah}_u. Gatho ya ts'oqui hingui ho, pe hinga gatho ya ts'oqui ri ts'ocua rá ndo'yo 'na. Pe nú'a ra ja'i da hñuxui 'nara 'behñ_a hingue xi rá 'behñ_a, nu'á ha, ri ts'ocse rá ndo'yo.

19 ¿Ha gue hingui pa_h_u gue numa ndo'yoh_u gue'a rá nija ra Maça Nda_{hi} nú'a 'bui ja ma corasoh_u? Aju_a go gue'a xa 'racaguih_u'a. Hangue ya hingo drí mandas_h_u.

20 Ngue'a Aju_a bi gutc'aguih_u xá ma_{di} co rá ji rá hmaca T'_u. Hangue 'yøth_u ra ts'edi gue da hneca rá nsunda Aju_a ja ri ndo'yoh_u ne ja ri corasoh_u, ngue'a numa ndo'yoh_u ne ma corasoh_u go rá me_{ti} Aju_a.

7

Ya hoga ts'ofopa nú'_u 'b_uyá 'behñ_a ne pa nú'_u jo'o

1 Nubyá ma ga xi'ah_u de nuya nt'ani grí 'ñanih_u nu ngá 'yopcah_u: Xá hñohma 'b_u ra 'ñøhø hinda me'tsa rá 'behñ_a,

2 pe ndunthi ya 'ñøhø hinda za da 'm_use nsingue rá 'behñ_a. Hangue por gue'a, pa hinda hñuxui ya 'behñ_a nú'_u hingue xi yá 'behñ_a, ma'na xá hño 'nara 'ñøhø dá nthatui 'nara 'behñ_a pa gue'a drá me_{ti}. Ha 'nara 'behñ_a ma'na xá hño dá nthatui 'nara 'ñøhø pa gue'a xi drá dame.

3 Ra 'ñøhø mahyoni da 'yøt'e co rá 'behñ_a nú'a rí 'ñepi, nehe njab_u da 'yøt'a ra 'behñ_a co rá dame nú'a rí 'ñepi.

4 Ý nura 'behñ_a ya hingo da mandas_e rá ndo'yo, ngue'a nurá dame go ri mandabi rá ndo'yo'a.

Njab_u nehe ra 'ñøhø ya hingo ri mandase rá ndo'yo, ngue'a nurá 'behña go ri mandabi rá ndo'yo'a.

⁵ Hangué 'yøth_u ngu nú'a rí 'ñep'a'ih_u de gue'aseh_u, odi 'ra'ah_u ra mfada 'na ngu ma'na. Pe 'b_u xcá cohih_u 'nara cohi pa gui 'yaph_u Ajuá, nu'bú h_u, da za gui 'uegueh_u 'raya pa. Nep_u de gue'a da za gui 'b_uh_u 'nadb_u mahyegui ma'na'qui pa njab_u hinda za da hya'ah_u ra Satá gui hñuxh_u co ma'na ra ja'i.

⁶ Stá xi'ah_u gue xá hño gui hongá ri 'behñah_u, pe hingo drí ja'ah_u, go da huanh_u nú'a gui 'yøth_u.

⁷ Pa guequi ga neh_u gue gatho da nja ngu dí nja hinstá nthati jo'o ma 'behña, pe cada 'na 'rama'na'ño yá mfeni xa umbabi Ajuá.

⁸ Nú'ah_u viudah_u, ne gatho nú'ah_u hinxcá nthatih_u, jo'o ri 'behñah_u nixi ri dameh_u, dí xi'ah_u ga neh_u gui njah_u ngu dí nja hinstá nthati jo'o ma 'behña.

⁹ Pe nu'b_u guí hanth_u gue Ajuá hinxa 'ra'ah_u ra ts'edi pa gui 'b_useh_u, ma'na xá hño gui nthatih_u, ngue'a hingui ho gui 'b_uh_u hønse co ra nc'at'i.

¹⁰ Y nú'ah_u 'b_u ri 'behñah_u, ha nú'ah_u 'behñah_u 'b_u ri dameh_u, dí 'bep'ah_u ngu nú'a bi mąnga ra Zidada, gue ni 'na de gue'ah_u hinda za gui nhyeguih_u. Hingo de guecshe dí 'bep'ah_u gui 'yøth_u njab_u, nura Zidada go gue'a ri 'bep'a'ih_u.

¹¹ Nu'b_u ra 'behña da hyep_u rá dame, odi j_u ma'na ra 'ñøhø pa drá dame, y nu'b_u ra 'ñøhø da hyep_u rá 'behña, odi j_u ma'na ra 'behña pa da 'yøt'e drá 'behña. Nu'a da 'yøt'e, ma'na xá hño dá mpumbabi ri yoho ne da yopa 'm_ui 'nadb_u ma'na'qui.

12 Nubya nugui go ma ga xi'ah_u nú'a dí beni gui 'yøth_u, hingo ra Zidada ri 'bep'ah_ubya. Nu'b_u 'nara cu pe'tsa rá 'behñ_a hingrá gamfri, ne nu'b_u nú'a ra 'behñ_a hini utsalá dame ngue'a ra gamfri, osti hep_u.

13 Y nu'b_u 'nara nju di pe'tsa rá dame hindra gamfri pe nu'b_u nú'a ra 'ñøhø hini utsalá 'behñ_a ngue'a ra gamfri, osti hep_u rá dame'a.

14 Ngue'a nu'b_u 'nara 'behñ_a ra gamfri ne rá dame hingrá gamfri, nú'a ra 'ñøhø'a hani rá japi Aju_a po rá 'behñ_a, ngue'a rá 'behñ_a rá batsi Aju_a. Y nu'b_u 'nara 'ñøhø ra gamfri ne rá 'behñ_a hingrá gamfri, nú'a ra 'behñ_a'a hani rá japi Aju_a po rá dame, ngue'a nurá dame rá batsi Aju_a. Nu'b_u hindi njab_u co ra 'ñøhø o ra 'behñ_a hingrá gamfri, nu'b_u nixi yá batsi hingá njapi. Pe nu'b_u njab_u h_a, njapi yá batsi.

15 Pe nu'b_u 'nara 'ñøhø hingrá gamfri ne da hyep_u rá 'behñ_a ngue'a ra gamfri, o nu'b_u 'nara 'behñ_a hingrá gamfri ne da hyep_u rá dame ngue'a ra gamfri, dá 'uegue, ngue'a nú'a ra cu o nú'a ra nju pe'tsa ra nsequi da 'uegue de nú'a hingrá gamfri, ngue'a Aju_a bi zoncah_u pa ga 'b_uh_u 'nara hoga'm_ui.

16 Xi nu'i zi nju, ¿ha gri p_adi ua da mpøhø ri dame po rá ngue'i? Nehe nu'i zi cu ¿ha gri p_adi ua da mpøhø ri 'behñ_a po rá ngue'i?

17 Cada 'na de gue'ah_u 'b_uh_u ngu nú'a xa 'yep'ah_u ra Zidada ante da zohn'ah_u'a pa gá camfrih_u. Nuna guehna drí 'bepabi da 'yøt'a gatho ya cu de hab_uraza ya nij_a.

18 Nu'b_u 'nara cu ya xa gamfri Aju_a ne xqui

thu'tsua ra seña ja rá ndo'yo, hinte ja. O 'b_u 'b_ui 'nara cu xa gamfri Aju_a ne hingui pe'tsa ra seña ja rá ndo'yo, ya odi huxa nú'a ra seña'a.

19 Hinte ri muui 'b_u to'o pe'tsa ra seña o hingui pe'tsi. Nu'a ma'na ri muui, nú'a ga øth_u nú'a ri manda Aju_a.

20 Cada 'na dá sigui dá mpefi hab_u mri mpefi de ante da gamfri Aju_a.

21 Nu'b_u xi ngrá nzai'b_ego de ngá camfri ma zi Hmuh_u ra Jesucristo, hini japi. Pe nu'b_u da za gui pøni dega 'b_ego, pøni 'bestho.

22 Nú'a mi 'b_ui dega 'b_ego ante da gamfri ra Zidada, ya nubyá hingrá 'b_ego de 'nara ja'i ja rá thandi Aju_a ngue'a ya rá 'b_ego ra Zidada. Nehe nu'a ra ja'i bi gamfri ra Zidada ne himi 'b_ui dega 'b_ego, nu'á go gue'a 'nara 'b_egobya de ra Zidada Jesucristo.

23 Aju_a bi gutc'aguih_u xá mađi, hangue nubyá ma ga peph_u'a, hingo ma ga pepabih_u ya ja'i.

24 Zi cuh_u, sigui gui mpeh_u há ngrí mpeh_u de gá camfrih_u ra Zidada Jesucristo, y Aju_a ja da 'm_uhni con gue'ah_u.

25 Y gatho nú'ah_u jo'o ri 'behñah_u, ha nú'ah_u 'behñah_u jo'o ri dameh_u, hinte xa 'b_epcagui ra Zidada ga xi'ah_u, hønse dí 'ra'ah_u 'nara ts'ofu de ma mfenise. Y nura ts'ofu'a gue'a majuani ngue'a Aju_a po rá ntheate xa hñuxcagui pa ga manbabi rá noya'a, hangue dí 'ra'ah_u 'nara hoga ts'ofu.

26 Nugui dí beni gue xá hño gui 'b_uth_u nsi ri 'behñah_u nsi ri dameh_u ngu guí 'b_uh_u, ngue'a xi ja ya ts'othogui nuya pabya dí 'b_uh_u.

27 Nu'b_u 'b_u ri 'behñ_a, oxqui hep_u. Ha nu'b_u jo'o,

oxqui honi.

28 Ha nu'b_u gui hongá ri 'b_ehñ_a, hingrá ts'oqui. Ha nu'b_u 'nara nxutsi da hyonga rá d_ame, hingrá ts'oqui nehe. Pe nu'a tó'o da hyonga rá 'b_ehñ_a, o nura 'b_ehñ_a da hyonga rá d_ame, ma da thogui ndunthi ya dum_ui, hangue nugui ga neh_ma gue hingui thoh_u ya dum_ui.

29 Zi cuh_u, dí ne ga xi'ah_u gue ya hinga ndunthi ya pa dí 'b_uh_uua. Hangue nu'a tó'o p_e'tsa rá 'b_ehñ_a, dá 'y_ot'a ra u_enda gue hingui p_e'tsi, pa da za da m_epabi Aju_a.

30 Nu'a tó'o zoni, odi oda rá mfeni ns_octa ra ts'oni, ne nu'a tó'o ri johya, odi oda rá mfeni ns_octa ra johya. Nu'a tó'o ri ntai, dá 'y_ot'a ra u_enda gue hinte p_e'tsi.

31 Ha nu'a tó'o ri johya co nuna ra ximhai, dá 'y_ot'a ra u_enda gue hini johya, ngue'a nuna ximhai 'yo rí uadi rí thogui.

32 Nugui ga neh_ma hingui jamasu ya t'øt'e de nuna ra ximhai, ngue'a nu'a tó'o jo'o rá 'b_ehñ_a xi ri jamasubi rá 'b_efi ra Zidada, ne 'b_ui pa da 'y_ot'a nú'a ri ho ra Zidada.

33 Pe nu'a tó'o 'b_u rá 'b_ehñ_a mahyoni da jamasu ya t'øt'e de nuna ra ximhai, ne da 'y_ot'a nú'a ri ho rá 'b_ehñ_a.

34 Ha nuya 'b_ehñ_a, hinga mahy_egui nú'a 'b_u rá d_ame co nú'a jo'o rá d_ame. Nu'a jo'o rá d_ame, ma'na ri jamasubi rá 'b_efi ra Zidada, ne 'b_ui pa da m_epabi Aju_a con gatho rá ts'edi ne con gatho rá mfeni. Pe nu'a tó'o 'b_u rá d_ame, mahyoni da jamasu ya t'øt'e de nuna ra ximhai, ne da 'y_ot'a ngu nú'a ri ho rá d_ame.

35 Núna dí xi'ah_u guehna pa go ri hño_h. Dí zo'ah_u pa gui 'yøth_u ra hño ngu rí 'ñepi gui 'yøth_u pa da za gui pεpabih_u Aju_a con gatho ri m_uih_u ne hinte da hy_u'ts'ah_u. Nugui hindí eñ'ah_u gue 'b_u gui hong_a ri 'behñ_ah_u hingui 'yø'tuah_u rá paha Aju_a.

36 Nu'b_u 'nara cu di 'b_u rá t'ixu, y handi gue ya da za da nth_ati'a, dá 'yøt'a ngu nú'a xa beng_a rá dada ante sta tho rá mb_atsja'i. Hingo 'nara ts'oqui nú'a xa beni da nth_ata rá t'ixu.

37 Pe nu'b_u 'nara cu 'b_u rá t'ixu, ne nura dada'a xa beni gue hinda th_ata rá t'ixu, ne 'b_u 'nadra mfeni xa beni gue hinhya'm_u da umba nsequi da nth_ata rá t'ixu, nú'a ra cu'a øt'e xá hño nehe.

38 Hangue nu'a tó'o ri unga rá t'ixu pa da nth_ati, xá hño øt'e. Nehe nu'a tó'o hingui ne da th_ata rá t'ixu, ma'na xá hño nú'a øt'e.

39 Nu'a ra 'behñ_a xa nth_ati, hingui tsa da 'uegue de rá dame núbya te rá dame, ngue'a njab_u m_anga ra ley. Pe nu'b_u ya da du rá dame, nú'a ra 'behñ_a'a 'b_u da beni da nth_ati, da za da nth_ati co nú'a da ne'a, h_onse gue drá gamfri h_a, ne 'b_u go rá paha Aju_a.

40 Pe nu'a go dí m_angá, ma'na xá hño hinda yopa nth_atihm_a. Guehna dí bengá, y dí camfri gue dí hanpabi rá Ma_aca Nda_hi Aju_a.

8

Ya hñuni nú' u thoqui pa da hñ'a'tua ya c'oi

¹ Nubyá ma ga xi'ah_u de nuya hñuni thoqui pa da hñ'a'tua ya c'oi. Dí pah_u gue gathoguih_u ja ma mf_adih_u. Pe nura mf_adi nsingue ra hm_ate ri jac_u ga 'ñets'ih_u, pe nura hm_ate xa 'rac_u Aju_a go gue'a ri jac_u ga tetuah_u yá jamfri ma miqu'eih_u.

2 Nu'a tó'o beni gue xi ja rá mfadi, go gue'a hingui pađi gatho nú'a rí 'ñepi da bađi.

3 Pe nu'a tó'o ri mađi Ajuá, Ajuá ma gue xá hño rá 'mái.

4 Nuya hñuni hña'tua ya c'oi 'bucua ja ra ximhai, hinte ri muui, ngue'a dí paḥu gue nuya c'oi'ua hinte ri muui. Ngue'a nuju dí paḥu gue 'nat'a Ajuá 'bui, hingui 'bui ma'ra.

5 Masque t'ena gue nuni mahets'i ne nuua ja ra ximhai 'bui ndunthi nú'ua t'embabi gue go gue'ua Ajuá, pe masque t'embi njabu, nu'ú hini mandaguihu.

6 Ngue'a pa guecaguihu dí paḥu gue 'nat'a Ajuá 'bui, y go gue'a ma Dadahu. Nú'á go gue'a bi hyoca gatho ya t'øt'e, ne dí 'buhua pa ga nsundahu'a. Nehe 'nat'a ma zi Hmuhu 'bui, y go gue'a ra Zidada Jesucristo nú'a to'o bi t'ent'ua ja rá 'yε pa go bi hyoca gatho ya t'øt'e, ne go gue'a bi 'racju 'nara 'ra'yo te.

7 Pe hinga gatho ya cu xa bađi xá hño gue 'nat'a Ajuá 'bui. 'Ra astabya hinxa pumfritho yá nzai mi pe'tsi nu de mi camfri ya c'oi, ne ora da zi nú'a ra hñuni xa hña'tuabi ya c'oi, beni gue go gue'a 'nara ts'oqui, ngue'a benthó gue nehe ya c'oi ja yá ts'edi, pe hina.

8 Pe hingue po ra hñuni da za ma'na ga 'buhu xá hño ja rá thandi Ajuá. 'Bu ga ñunihu, hinte ja, y nu'bu hinga ñunihu, nehe hinte ja.

9 Pe masque dí pe'tshu ra nsequi pa ga øthu 'na de guehya, mahyoni ga jamasuhu pa hinga japhu da 'yøt'a ya ts'oqui nú'ua otho ndunthi yá jamfri.

10 'Bu 'nara cu otho ndunthi rá jamfri, ne da hyant'a'i gri hudi gri ñuni ja 'nará ngo 'nara c'oi,

nu'bú nú'a ra cu'a 'na tui rá jamfri, grí cadi pa da thogui da ñuni nehe'a.

¹¹ Y njabu masque pa ja ri mfeni hingrá ts'oqui ngue'a guí padi nú'a guí øt'e, pe njabu guí japa nuri cu da menga ja ra ts'oqui. Y guí padi gue nehe po nura cu'a bi du ma zi Hmuhu ra Jesucristo.

¹² Hangue nu'bu njabu nú'i guí ts'ocua rá mfeni 'nara cu nú'a othotho ndunthi rá jamfri, padi gue numa zi Hmuhu ra Jesucristo go gue'a guí ø'tua nú'a ra ts'ocate'a.

¹³ Hangue 'bu po 'nara hñuni ga tsi, ga japi da nts'oca 'nama cu, nu'bú ma'na xá hño hinhya'mu ga tsi nura hñuni'a.

9

Ra nsequi nú'a mi pe'tsa ya apostol

¹ Pahú xá hño gue nugui drá apostol de ra Zidada Jesucristo dí pe'tsa ra nsequi ga øt'a ngu nú'a rí 'ñepcagui ngue'a drá apostol. Nugui stá handa ma Zidadahu ra Jesu, ne go dá zo'ahu de gue'a pa gá camfrihu.

² Nu'bu ma'ra ya cu beni gue hinga majuani drá apostol, pe nu'ahu ha, guí pahú gue drá apostol ngue'a xcá camfrihu Ajuá po ma noyaga.

³ Ne nú'u to'o ñama'ñu de guecagui, njaua dí xipabi:

⁴ ¿Ha gue hiní 'ñepcagui da t'aqui nú'a te ga tsi?

⁵ ¿Ha gue hindí pe'tsa ra nsequi 'bu ga ne ga hongma 'behña ne ga tsits'i habu dí 'yo ngu øt'a ra cu Pedro ne ma'ra ya apostol ne nú'u yá cu ra Zidada Jesu?

6 Nugui ne ra cu Berhna ¿ha gue hõnseguihe hiní 'ñepcahmahe da t'acje te ga tsihmahe nsinque ga mpehe?

7 ¿To'o gue'a 'bui dega soldado ne hingui t'umbi te da zi? ¿To'o nú'a pe'tsa 'nara ua'obxi ne hinda zipabi rá fruta? ¿To'o nú'a pe'tsa ya mbo'ni, ne hinga ja ri ñuni ja yá mbo'ni?

8 Núna dí ma, oguí beñhu gue go dí mansε, ngue'a njabu mąnga rá ley ra Moise,

9 ne ena njaua: “Oxqui tu'tuahhu rá ne ra ndamfri ora net'a ra trigo ja ra era.” ¿Ha gue Ajuá bi ma xi majuani de ra ndamfri?

10 Hina, nu'á bi ma pa guecaguihu, ne bi t'ofa pa go ma hñohhu, ngue'a nu'a tó'o fuxa ra hai ne nu'a tó'o juxa ra sofo, rí 'ñepi da zi de nú'a pot'i'hu.

11 Hangue nu'ahhu guí njahhu ngu 'nara 'bot'i y nuje ngu go dyá mot'ihe ngue'a dá xi'ahé rá noya Ajuá. Nu'bú ¿ha gue hiní 'ñepi gui faxcahe ne gui 'racje te ga tsihe?

12 Nu'bhú nú'hu ma'ra ya cu ri mpefi con gue'ahhu go guí faxhu ne guí umfu te da zi, xi nuje ¿ha gue hingo ma'na rí 'ñepcaguihe gui faxcahe?

Nuje, asta nubyá hinte stá a'a'ihe, masque rí 'ñepcaguihehma. Nu'a dí øthe, dí tsethe ra thuhu ra nduthe pa hinto da ñama'ñhu de rá noya ma zi Hmuhhu ra Jesucristo.

13 ¿Ha gue hinguí pahhu gue nu'a tó'o ri mpefi ja yá ndañija ya xodyo ja da t'umbabini te da zi? Y nu'a tó'o ri mpefi ja ra ata tsi nú'hu ya mbo'ni tho dega hñá'ti pa Ajuá.

14 Njabu bi manda ra Zidada nehe gue nu'a tó'o mąnga ra maça hoga noya rí 'ñepabi da t'umbabi

te da zi.

15 Pe nugui masque rí 'ñepcagui, pe hinte stá a'ah_u nixi hindí op'a'ih_u pa ga a'ah_u nú'a te dí honi. ¡Ngue'a nugui masque drí 'ñuni ga tu pe hindí ne to'o da 'ñena gue dí m̄anga ra m̄aca hoga noya pa h̄onse dí t̄ah̄a nú'a dí tsi!

16 Hingui tsa ga 'ñets'i ngue'a dí m̄anbabi rá noya Aju_a, ngue'a nu'b_u hinga m̄a, ¿te ma ga th̄adi ja rá thandi Aju_a? Nu'b_u hinga m̄anba rá noya Aju_a, guehna 'nara dum̄i pa guecagui.

17 Nu'b_u núgui dí m̄anba rá noya Aju_a con gatho ma paha, nu'b_u dí t̄o'mi gue go ma da gutcagui Aju_a. Pe nu'b_u núgui hinga neh̄m̄a ga m̄anbabi rá noya Aju_a, pe guehna ma 'b̄efi xa t'acagui, hangue mahyoni ga øt'e.

18 Nu'b_u, ¿xi nda'a ma th̄ah̄a? Nu'a ma th̄ah̄ah̄m̄a, ga johya ga m̄anba rá noya Aju_a nsinque te da t'aqui de guecua, masque rí 'ñepcah̄m̄a.

19 Nugui hindrá 'b̄ego de 'nadra ja'i, nugui drá 'b̄ego pa gatho ya ja'i, ngue'a dí zof'o_u pa njab_u ndunthi de gue'̄u da gamfri ma zi Hmuh_u ra Jesucristo.

20 Nugui dí øt'a ngu yá nzai ya xodyo pa da za ga zof'o_u, nehe dí øt'a ngu yá nzai nú'u 'b_u ja rá hm̄anda ra nd̄axjua ley pa da za ga zof'o_u nehe'̄u, masque nugui ya hindí 'b̄u de ja ra nd̄axjua ley.

21 Nehe dí øt'a ngu yá nzai nú'u hingui 'b̄u ja rá hm̄anda ra nd̄axjua ley pa njab_u da za ga zof'o_u nehe. Pe nugui hinstá 'uegue de ja rá ley Aju_a, ngue'a nugui dí 'b̄u de ja rá hm̄anda ma Zidadah_u ra Jesucristo.

22 Nehe dí øt'a ngu yá nzai nú'ũ ya cu ts'ũtho yá jamfri, pa da za ma'na ga zofo'ũ. Nugui stá nzai ga tembabi yá nzai gatho ya ja'i pa da mpøhø 'ra de gue'ũ, ngue'a cada 'na de gue'ũ, 'rama'na'ño hanja gra zofoga'ũ.

23 Dí øt'a njabũ ngue'a dí ne gue ma'na da ntunga ra maça hoga noya, ne pa njabũ da za ga hani ndunthi ya japi bra hña nura maça noya'a.

24 Ha gue hinguí pahũ gue gatho nú'ũ ri ntsa'rihi, da ma mahyεgui, pe 'mefa 'natho nú'a to'o ma da dahã. Nujũ nehe ma ga øthũ njabũ, ga 'yohũ xá hño ja rá thandi Ajuã pa njabũ ga hanga ma thãhãhũ nehe nú'a ma da 'racjũ'a.

25 Dí pahũ gue gatho nú'ũ to'o ri ntsa'rihi xi ri su rá ndo'yo pa da nja rá ts'edi. Nu'ú øt'a njabũ hønse pa da dahã 'nara thãhã nú'a ma da thegue. Pe nujũ dí pahũ gue ma ga hãñhũ 'nara thãhã nú'a hinhya'mũ ma da thegue.

26 Hangue nugui drí hña ra 'rihi nehe, pe drá ma manjuãtho pa nuni habũ ma ga tsøni, ne co rá ts'edi Ajuã drí ntuhni pa ga ntate, hingue hønse dí 'ñenitho.

27 Nugui xi drí su ma ndo'yo nehe pa hinte da 'yøt'e, y drí japi da 'yøt'e nú'a go dí ne, ngue'a hindí ne ga 'bε ma tsa ja rá thandi Ajuã, masque stá zofohmã ndunthi ya ja'i.

10

Ra ts'ofo pa hinda søcambeni ya c'oi

1 Zi cuhũ, dí ne ga ben'ahũ nehe gue nú'ũ ndu ma xitahũ nu de bá pønga de Egipto bra zi ra Moise,

ne mri 'bet'o 'nara guui, ne bi 'rax'ɥ ja ra Thenga Ndehe.

² Nu'ú bi dɛna ra guui ne bi 'ranga ja ra Thenga Ndehe, hangue nu'ú bi 'natho co ra Moise, go gue'a 'nara nt'udi de ra sistehe.

³ Ne dí pahɥ gue gatho'ɥ mahyɛgui bi zi nú'a ra nzaqui bá ehe de mahets'i.

⁴ Ne gatho mahyɛgui bi zi nú'a ra dehe bá pɛhna Ajuá ne bi bøhø de ja 'nara do. Y nú'a ra do'a gue'a 'nara nt'udi de ma zi Hmuhɥ ra Jesucristo mi 'yo con gue'ɥ habɥraza mi 'yo'ɥ.

⁵ Pe ndunthi de gue'ɥ, Ajuá bi hyandi gue hinxmá hño nú'a mi øt'e'ɥ, hangue ndunthi de gue'ɥ bi du ja ra mbonhi.

⁶ Gatho nú'a bi thogui'ɥ go gue'a ngu 'nara ts'ofu pa guecjɥ, pa hinga hyøcjɥ nú'ɥ ya t'øt'e xá nts'o, ngu nú'a bi 'yøt'e'ɥ.

⁷ Hinga beñhɥ ga nsundahɥ ya c'oi ngu bi 'yøt'a 'ra de gue'ɥ, ngu engá ja ra Măca T'ofu: “Ya ja'i bi hñudi bi ñuni ne bi ntsithe, nepɥ de gue'a bi 'mai bi 'yø'tua yá ngo ya c'oi co ya hnei.”

⁸ Ne hinga hñuxhɥ co ya 'bɛhñá nú'ɥ hingue xi ma 'bɛhñahɥ ngu bi 'yøt'a 'ra de gue'ɥ, hangue nu'ú 'nada ra pa bi du 'natemáhñu 'mo ya ja'i.

⁹ Nixi hinga beñhɥ ga tsø'tuahɥ rá mui Ajuá ngu bi 'yøt'a 'ra de gue'ɥ, hangue 'nara pa ndunthi de gue'ɥ bi mɥhna ya qu'eñá, ne bi du'ɥ.

¹⁰ Ne hinga ñama'ñhɥ de nú'a øt'e Ajuá con guecjɥ ngu bi ñama'ñhɥ 'ra de gue'ɥ, hangue 'nara pa Ajuá bá pɛhna 'nara ɛnxɛ pa bi hyo'ɥ.

¹¹ Gue'a gatho bi thogui ndu ma xitahɥ, ne bi t'ofu pa njabɥ ga beñhɥ gue guehna 'nara ts'ofu pa

guecju núju dí 'buhua ja ra ximhai de nuya ngaxa pabya.

12 Hangué nu'u tó'o beni gue xi 'bui xá hño, dá nsu pa hinda dapi da 'yøt'a ya ts'oqui.

13 Gatho nú'u ya ts'othogui dí thoguihu, njabu thogui nehe gatho ma'ra ya ja'i. Pe Ajuá nzantho sugaguihu, y nu'á hinda hocju ga thohu ya ts'othogui nú'u da hyandi'a gue hinda za ga tsethu. Ha nura ora dí thohu 'nara thogui, nu'á ri 'racju ra ts'edi pa ga tsethu.

14 Hangué dí xi'ahu zi cuhu, ogrí nsundahu ya c'oi. 'Ueguehu de nú'a ra nzai'a.

15 Dí xi'ahu njabu gue'a dí padi gue nú'a dí xi'ahu 'bestho tso ri mfenihu, y nu'asethu da za gui pahu ua majuani nú'a dí ma ua hina.

16 Ora dí tsihu ra Maca Nt'oxi, gue'a 'nara nt'udi gue dí 'nathohu co ma Zidadahu ra Jesucristo ne núju 'na ngu ma'na. Nu de dí aphu Ajuá dí tsihu ra vinu, y nura vinu'a go gue'a 'nara nt'udi de rá maca ji ma zi Hmuhu ra Jesucristo nú'a bi mani ja rá pont'i'a po rá nguecju. Y nú'a ra thuhme dí hñeguehu, go gue'a 'nara nt'udi de rá zi ndo'yo'a nú'a bi uni pa bi tho po rá nguecju.

17 Masque nuju drí ndunthihu, pe 'nada nú'a ra thuhme dí tsihu, hangué por gue'a drí 'nathohu.

18 Ngu dí pahu gue nuya me Israel nú'u to'o mi tsi nuya mbo'ni mi ts'at'i dega hñati, mi 'natho yá jamfri mi xøcambeni Ajuá, hangué nu'ú mi 'natho nehe'u po nú'a mi tsi'u.

19 Nugui hingo dí xi'ahu gue ya c'oi ja yá ts'edi, ne hindí xi'ahu gue ri muui nú'u ya hñuni xa hñatuabi'u, gue'a nu'ú hinte ri muui y nixi otho

yá ts'edi'ũ.

²⁰ Nu'a dí xi'ahũ gue nuya hñuni hoca nú'ũ hingyá gamfri pa da umbabi ya c'oi, nuya hñuni'ũ go gue'ũ pa ya ts'ondahi, hingue pa Ajuã. Y nuguí hindí ne guí 'nathohũ co ya ts'ondahi.

²¹ Hinda za guí tsihũ ra Maça Nt'oxi ne guí tsihũ nú'a thocuabi ya ts'ondahi. Ne hinda za guí hñuhũ ja rá mexa ra Zidada nepũ ma grí huhũ ja ya mexa habũ t'ø'tua yá ngo ya c'oi, ngue'a nu'ú go gue'ũ de ra ts'ondahi.

²² ¿Ha gue guí nehũ ga tsø'tuahũ rá mui ra Zidada? O ¿ha gue guí beñhũ gue go ma'na ja ma ts'edihũ de gue'a? Hina.

Ra gamfri pε'tsa ra nsequi da 'yøt'a nú'a go da ne pe co ra hmãte

²³ Zi cuhũ, da za guí beñhũ gue hã dí pε'tshmahũ ra nsequi ga øthũ gatho nú'a ga nehũ. Pøde hã da za, pe hinga gatho rí 'ñepi ga øthũ, ne hingue por gatho ya t'øt'e da za ma'na da te ma jamfrihũ.

²⁴ Oguí suhũ hønse ri tehũ, supabihũ rá te nehe ri miqu'eihũ.

²⁵ Tsihũ gatho nú'a te 'ba ja ra tai, ogrí 'ñanihũ 'mεt'o ua xa hñã'tuabi ya c'oi o hina, pa hinda ts'oca ri mfenihũ.

²⁶ Ngue'a ra Zidada go rá mεti gatho ra ximhai ne gatho nú'a ja ja ra ximhai.

²⁷ Nu'bũ 'nara ja'i hingrá gamfri da zix'ahũ ja rá ngu pa guí ñuñhũ con gue'a, ha nu'bũ guí ne guí maha con gue'a, rí maha ne tsihũ gatho nú'a da 'ra'ahũ nsinque guí 'yambabihũ habũ xuá hñã, pa hinda ts'oca ri mfenihũ.

28 Pe nu'bu da 'm̥a 'na to'o da xi'ah̥a gue nú'a te ma gui tsih̥a xa h̥ña'tuabi ya c'oi, nu'bu̇ oguí tsih̥a pa hingui ts'ocuah̥a rá mfeni nú'a to'o bi xi'ah̥a.

29 Nugui hindí xi'ah̥a gue go ma da ts'oca ri mfenih̥a, dí xi'ah̥a pa nú'a to'o da xi'ah̥a gue hingui ho nú'a ma gui tsih̥a, pa hingui ts'ocuah̥a rá mfeni'a.

Pe da za da beng̥a 'na ne da ñ̥ena: “¿Hanja go da za da th̥agagui hinga øt'a 'nara t'øt'e ngue'a ma'na ra cu beni gue ra ts'oqui?”

30 Nu'bu̇ dí tsi te dí tsi ne dí umbabi njam̥adi Aju̇a, ¿hanja ma go da n̥ongagui ma'na ra cu por nú'a te dí tsi?”

31 Pe nugui dí xi'ah̥a, gatho nú'a gui øth̥a, 'bu̇ gri ñ̥uñ̥h̥a, 'bu̇ gri tsitheh̥a, 'bu̇ gri øth̥a ma'na te gri øth̥a, 'yøth̥a gatho pa rá nsunda Aju̇a.

32 Jamasuh̥a nú'a gui øth̥a pa hingui ts'ocuah̥a yá mfeni ya xodyo, nixi nú'̥a hingyá xodyo, nixi nú'̥a ya cu 'bui ja rá nij̥a Aju̇a.

33 Nugui dí øt'a ra ts'edi pa ga øt'a nú'a xá h̥ño pa ga hu'mbabi yá mai gatho ne hinga ts'ocua yá mfeni. Nugui hindí hons̥e ra h̥ño pa guequi, dí øt'a nú'a xá h̥ño qué pa da mpøhø ma'ra.

11

1 'Yøth̥a ngu núna dí øt'e, ngue'a nugui dí øt'a ngu nú'a bi 'yøt'a ma zi Hmuh̥a ra Jesucristo.

Ra ts'of̥o pa ya 'b̥eh̥ña nú'̥a pa ja ya hmunts'i

2 Zi cuh̥a, nugui drí johya ne dí ex'ah̥a ngue'a hinxcá pumfrih̥a gatho nú'a stá xi'ah̥a, ne guí øth̥a gatho ngu nú'a stá u't'ah̥a gui 'yøth̥a.

3 Pe nuguí dí ne guí p̄adih̄ gue numa zi Hmuh̄ ra Jesucristo go gue'a ra ñaxu de gatho ya 'ñøhø, y nura 'ñøhø gue'a ra ñaxu de rá 'behña, y nu Ajuā ra Dada go gue'a ra ñaxu de ma zi Hmuh̄ ra Jesucristo.

4 Nu'b̄u 'nara 'ñøhø xa go'ma rá ñaxu ora apabi Ajuā de ja ya hmunts'i, o de ora ñā de rá noya Ajuā, njab̄u ri 'betua rá tsa rá ñaxuse.

5 Pe nu'b̄u 'nara 'behña hinx̄a go'ma rá ñaxu ora apabi Ajuā ne ora manbabi rá noya'a, ri 'betua rá tsa rá ñaxuse, tsatho xa 'ñaxi.

6 Nu'b̄u ya 'behña hingui co'ma yá ñaxu, ma'na xá hño dá 'ñaxi, pe nu'b̄u gue'a 'nara 'betsa da 'ñaxi, ma'na xá hño dá go'ma rá ñaxu ora apabi Ajuā.

7 Nura 'ñøhø hiní 'ñepi da go'ma rá ñaxu ngue'a nura 'ñøhø bi hyoca Ajuā ngu tengu rá 'bai'a ne ja ri hnequini nurá nsunda Ajuā. Pe nu ja ra 'behña, ja ri hnequini rá nsu ra 'ñøhø.

8 Ngue'a nura 'ñøhø hingue bi thoqui de ra 'behña, nura 'behña bi thoqui de ra 'ñøhø.

9 Y nura 'ñøhø himbi thoqui po rá ngue ra 'behña, nura 'behña hā, bi thoqui po rá ngue ra 'ñøhø.

10 Hangue nura 'behña rí 'ñepi da go'ma rá ñaxu po rá ngue ya enx̄e handgah̄, ngue'a gue'a 'nara seña gue 'b̄ui to'o ma'na ri manda que ya 'behña.

11 Pe de ja rá thandi Ajuā gatho'̄u ri muui mahȳgui, gue dra 'behña gue dra 'ñøhø, ngue'a nsinque ra 'ñøhø hinx̄a 'm̄u ra 'behña, ha nsinque ra 'behña hindi 'b̄u ya 'ñøhø.

12 Ngue'a desde ra m̄udi nura 'behña gá 'ñehe de ja ra 'ñøhø, y nubyá, nura 'ñøhø rí 'ñehe de ja ra 'behña, pe gatho go øt'e Ajuā.

13 Xi da beñh_u xá hño, ¿ha gue ri hnequi xá hño 'nara 'b_ehñ_a ora apabi Aju_a ne hinxa go'ma rá ñaxu?

14 ¿Ha gue hingrá 'b_etsa 'b_u 'nara 'ñ_oh_o da hopi da te rá sta?

15 Pe nu'b_u ra 'b_ehñ_a da hopi da te rá sta, nú'á ha, rá nts_ohui, ngue'a gue'a xa t'umbabi pa da go'ma rá ñaxu ngu 'ñena 'nara c_oni.

16 Pe nu'b_u da 'm_u 'ra to'o da ne da ntsanoya de núna dá ma de yá sta ya 'b_ehñ_a, pa_h_u xá hño gue nuje gue'a ma nzaihe, ne yá nzai ma'ra ya cu nú'ú 'b_ui ja ma'ra yá nija Aju_a.

Ya cu bi zi ra Maça Nt'oxi ngu himi 'ñepabi'ú

17 De núna dí op'ah_ubya hingui tsa ga ex'a'ih_u ngue'a stá øde de nú'a guí øth_u ora grí muntsh_u, hinguí øth_u nú'a xá hño, h_onse guí øth_u nú'a hingui ho ja rá thandi Aju_a.

18 Dí øde gue ora grí muntsh_u, guí øth_u ya hegue, ngue'a hinga mahy_egui nú'a guí mañh_u, y dí camfri gue ngu'b_u gue'a guí øth_u.

19 Pe pøde mahyoni da njab_u, pa ja da hnequini nú'ú to'o hanpa rá mfa_i Aju_a, y nú'ú to'o hina.

20 Ora grí muntsh_u pa guí nt'oxih_u nep_u guí tsih_u ra Maça Nt'oxi, nú'a guí øth_u hinguí øth_u pa ra Zidada,

21 ngue'a nú'a guí ha_xh_u pa guí tsih_u, grí 'bet'oh_u guí da_ma tsi_eh_u, ne hinte guí x_epabi_h_u nú'ú ma'ra ya cu. Hangu_e 'ra de gue'ah_u guí tuh_u ra thuhu, ha nu ma'ra xi grí tithoh_u.

22 ¿Hanja guí øth_u njab_u? ¿Ha gue otho ri nguh_u hab_u guí ñuñh_u ne guí ntsitheh_u? ¿Ha gue grí utsabi_h_u rá maça nija Aju_a? ¿Ha gue hinguí

'betuah_u yá tsa nú'_u ma'ra othobi te da zi? Xibya, ¿te guí ne ga xi'ah_u? ¿Ha gue ga e'ts'a ri nsuh_u? Hina, ngue'a núna guí øth_u hinxá hño.

Ra Maça Nt'oxi

(Mt. 26:26-29; Mr. 14:22-25; Lc. 22:14-20)

²³ Nugui ya stá u't'a'ih_u hanja grí tsih_u ra Maça Nt'oxi ngu nú'a bi 'ñutcagui ra Zidada. Nú'a ra xuui bri da'a, bi g_u ra thuhme,

²⁴ nep_u bi umba njamadi Ajuá. Ne de gue'a bi hyeca nura thuhme'a, nep_u bi 'ñena: “Tsih_u nuna ra thuhme, ja ra uenda go guehna ma ndo'yo núna ma da hna'mbabi po rá ngue ri ts'oquih_u. Ne ora gui tsih_u nuna ra thuhme, 'yøth_u ngu 'nara feni de guecagui.”

²⁵ Nep_u ngu bi uadi bi nt'oxi'_u, ra Jesu bi g_u 'nara vaso hab_u mi po ra vinu, ne bi 'ñembabi'_u: “Nuna vinuna, go guehna 'nara nt'udi de nú'a ra 'ra'yo cohi ma ga øt'e co ma ji nú'a ma ga fani. Ora gui tsih_u nuna vinuna, 'yøth_u ngu 'nara feni de guecagui.”

²⁶ Hangue nú'a ra ora guí tsih_u ra thuhme ne ra vinu gue'a ra ora guí udih_u de rá du ma Zidadah_u asta nú'a ra pa'a stua yopa pengui.

Hanja da za da ts'i ra Maça Nt'oxi ngu ri ho ra Zidada

²⁷ Hangue nugui dí xi'ah_u gue nu'a tó'o da zi nú'a ra thuhme'a ne nú'a ra vinu'a ne hinda zi ngu rí 'ñehe, nú'a ra cu'a ma go da dadi de rá zi ndo'yo ne de rá zi ji ra Zidada.

²⁸ Hangue cada 'na de gue'ah_u, beñh_u xá hño 'mæt'o ua guí 'buh_u xá hño co Ajuá pa gui tsih_u ra thuhme ne ra vinu.

29 Ngue'a nu'a tó'o hinda zi nú'a ra thuhme ne nú'a ra vinu ngu rí 'ñehe, ne hinda beni xá hño te ri muui rá du ra Zidada, nú'a ra cu'a tuxase ra ts'oqui.

30 Hangue por gue'a ndunthi de gue'ah_u grí hñenih_u ne otho ri nzaquih_u, ha nehe xa du 'ra de gue'ah_u.

31 Pe nu'b_u ga benseh_u de nú'a te stá øth_u ne ga ntsø'mh_u, nu'bú Ajuá ya hindua pęcaguih_u nuya ya mfei.

32 Nu'á bí pęcah_u ya mfei pa da zocj_u pa hinda condenaguih_u mahyεgui co nú'u hingyá gamfri.

33 Hangue ma zi cu'ih_u, ora grí muntsh_u pa gui ñuñh_u, ntø'mh_u 'na ngu ma'na pa gui ñuñh_u mahyεgui.

34 Nu'b_u 'na de gue'ah_u di tsu'ah_u ra thuhu, ma'na xá hño ñuñh_u 'met'o ja ri nguh_u pa nu xcrí muntsh_u gui 'yøth_u ngu nú'a ri ho Ajuá, pa hinda za'ah_u rá mfei'a. Y de nú'u ma'ra ya t'øt'e xa nja, nu'á asta hinga mab_u pa ga ñah_u de gue'u.

12

Ya mƒadi ne ra ts'edi nú'u ri 'racj_u ra Māca Ndahi cada 'na de guecj_u

1 Zi cuh_u dí ne gui pah_u de nuya mƒadi ne ra ts'edi ri 'racj_u ra Māca Ndahi cada 'na de guecaguih_u.

2 Guí pah_u xá hño gue nú'b_u hingüí camfrithoh_u rá noya Ajuá ngrí hothoh_u da zix'ah_u to'oraza pa nguí xøcambenih_u nú'u ya c'oi otho yá ts'edi ne hingui ña.

3 Pe nubyá dí ne gui pah_u gue nu'a tó'o tsanga ra Zidada Jesu, hingui hanpa rá ts'edi ra M̄aca Ndahi. Ha nu'b_u to'o da 'ñena, dí camfri ra Jesu gue go gue'a ra Zidada, nú'á ha, hanpa rá ts'edi ra M̄aca Ndahi.

4 'Rama'na'ño ya mfadi ne ra ts'edi xa 'racj_u ra M̄aca Ndahi pa ga p̄epabih_u Ajuá, pe ra M̄aca Ndahi go gue'a 'natho.

5 Y nehe 'rama'na'ño ya 'b̄efi xa 'racj_u ra Zidada ga p̄efih_u, pe ra Zidada go gue'a 'natho.

6 Nehe 'rama'na'ño hanja drí mp̄efih_u, pe nu Ajuá go gue'a ri 'racj_u ra ts'edi gathoguih_u, pa ga p̄eh_u ngu nú'a xa 'racj_u'a, y nu Ajuá go gue'a 'natho.

7 Cada 'na de guecj_u dí hanpah_u rá ts'edi ra M̄aca Ndahi pa ga faxh_u gatho nú'u ma'ra.

8 'Ra de guecj_u xa 'racj_u ra ts'edi ra M̄aca Ndahi pa ga ñah_u co ndunthi ra mfadi, ha nu ma'ra de guecj_u guet'atho ra M̄aca Ndahi xa 'racj_u ra mfadi pa ga udih_u te rí b̄onga rá noya Ajuá.

9 Nu ma'ra de guecj_u guet'atho ra M̄aca Ndahi xa 'racj_u ndunthi ra jamfri, ha nu ma'ra de guecj_u guet'atho ra M̄aca Ndahi xa 'racj_u ra ts'edi pa ga øtheh_u ya da'thi.

10 Ma'ra de guecaguih_u xa t'acj_u ra ts'edi pa ga øth_u ya dang_u nt'udi. Ha nu ma'ra de guecj_u xa t'acaguih_u ra ts'edi pa ga manbah_u rá noya Ajuá. Ha nu ma'ra de guecj_u xa t'acaguih_u ra ts'edi pa ga pah_u xá hño ua de ra M̄aca Ndahi ña 'nara ja'i, o hina. Ha nu ma'ra de guecj_u xa t'acj_u ra ts'edi pa da za ga ñah_u de ma'ra ya hñaq_ui. Ha nu ma'ra de guecj_u xa t'acj_u ra ts'edi pa ga pah_u te rá 'b̄e m̄anga nú'a to'o gra ña de ma'na ra hñaq_ui.

11 Pe go guet'a ra Maça Ndaḥi ri 'racj_u ya mfaḍi ne ra ts'edi cada 'na de guecaguih_u ngu nú'a go da ne'a.

Gathoguih_u dí 'nada ra ndo'yoh_u co ra Zidada Jesucristo

12 Cada 'na de guecaguih_u numa ndo'yoh_u xi pe'tsa ndunthi ya xeni, pe masque njab_u 'nada ma 'baih_u dí pe'tsh_u. Dí njah_ub_u nehe co ma zi Hmuh_u ra Jesucristo, ngue'a nujú ngu go dyá xeni_u de rá ndo'yo'a, pe rá ndo'yo'a 'natho.

13 Ngue'a gathoguih_u 'b_u dyá xodyoh_u o hindyá xodyoh_u, 'b_u dyá 'b_ugoh_u o hindyá 'b_ugoh_u, gathoguih_u stá nxisteheh_u pa dá 'nada ra ndo'yoh_u co rá ts'edi ra Maça Ndaḥi, ne gathoguih_u 'nat'a ra Maça Ndaḥi stá hañh_u.

14 Numa ndo'yoh_u xi pe'tsa ndunthi ya xeni, hingue 'natho ra xeni pe'tsi.

15 'B_u 'nama uah_u da 'ñena: “Nuguí hindí 'b_ui ja ra ndo'yo ngue'a hingo drá 'yε”, pe hingue ngue'a mąnga njab_u ya hingui 'b_ui ja ma ndo'yoh_u.

16 O nu'b_u 'nama guh_u da 'ñena: “Nuguí hindí 'b_ui ja ra ndo'yo ngue'a hingo drá da”, pe hingue ngue'a mąnga njab_u ya hingui 'b_ui ja ma ndo'yoh_u.

17 'B_u gatho ma ndo'yoh_u dra da, ne di otho ma guh_u, nu'bú ḷhanja da za ga ødeh_u? 'B_u gatho ma ndo'yoh_u dra gu, ne 'b_u di otho ma xiñuh_u, nu'bú ḷhanja da za da nja ma fahah_u?

18 Pe Ajuá bi hñuscaguih_u gatho ya xeni de ma ndo'yoh_u pa hinte da 'yøtcah_u ra 'b_uedi. Y bi hñuts'i ngu nú'a go bi ne'a.

19 Nu'b_u di 'nada ra xeni ma ndo'yoh_u, ne di 'nada rá 'b_uefi, nu'bú hindri xøgue ma 'baih_u.

20 Pe numa ndo'yoh_u masque pe'tsa ndunthi ya xeni, pe 'nada ra 'bai pe'tsi.

21 Numa dah_u hingui tsa da 'ñemba ma 'yeh_u: “Nugui hindí hoñ'aua.” Nixi ma ñaxuh_u hingui tsa da 'ñemba ma uah_u: “Nugui hindí hoñ'aua.”

22 Hina, hinda za da 'ñutsa'uh, ngue'a nú'uh ya xeni de ma ndo'yoh_u ri hnequi ngu hinte ri muui, go gue'uh ma'na øt'a ra 'bedi.

23 Ha nuya xeni de ma ndo'yoh_u nú'uh dí beñh_u gue otho yá nsu, nú'ú go gue'uh ma'na xi dí japama-suh_u. Y nú'uh ya xeni ngu ra 'betsa 'b_u da hnequitho, nú'ú go gue'uh dí heth_u pa da hnequi xá hño.

24 Pe nuya xeni de ma ndo'yoh_u ri hnequi ma-hotho, nú'ú hinga mahyoni ga heth_u pa da hnequi xá hño. Njab_u Aju_u bi hyoga ma ndo'yoh_u gue nú'uh ya xeni mi otho yá nsu go gue'uh ma'na da nja yá nsu,

25 pa njab_u da mpefi mahyegui gatho ya xeni de ma ndo'yoh_u, ne gatho'uh da mfats'i 'na ngu 'na.

26 Hangue 'b_u ga tsama'ñuh_u 'nara xeni de ma ndo'yoh_u, gatho ma ndo'yoh_u tsama'ñ_u nú'a ra ugui'a. Y nu'b_u 'nara xeni de ma ndo'yoh_u hanga 'nara hoga hño, nu'bú gatho ma ndo'yoh_u ri johya.

27 Nuj_u go guecj_u rá ndo'yoguih_u ma zi Hmuh_u ra Jesucristo, y cada 'na de guecaguih_u dí 'nara xeni_u de rá ndo'yo'a.

28 Aju_u bi hñuxa ja rá nija 'rama'na'ño ya mefi: Nu'a xi rá mudi bi hñuxa ya apostol. Nurá ñoho bi hñuxa nú'uh to'o da manbabi rá noya'a. Nurá hñu bi hñuxa ya xahnate. Nep_u de gue'a bi hñuxa nú'uh to'o øt'a ya danga nt'udi, nep_u nú'uh to'o øthe ya da'thi. Nep_u bi hñuxa nú'uh to'o faste ja rá 'befi'a, nep_u bi hñuxa nú'uh to'o ri su gatho nú'uh ya 'befi'uh,

nep_u bi hñuxa nú'_u to'o da za da ñ_a de ya hñ_aqui nú'_u hingui f_adi.

²⁹ Nde nu'b_ú, ¿ha gue gatho ya cu go ya apostol? O ¿ha gue gatho xa t'umbabi ra 'b_efi pa da m_an_babi rá noya Aju_a? O ¿ha gue gatho p_e'tsa ra 'b_efi dega xahnate? O ¿ha gue gatho da za da 'y_øt'a ya d_anga nt'udi?

³⁰ O ¿ha gue gatho xa t'umbabi ra ts'edi pa da 'y_øthe ya da'thi? O ¿ha gue gatho da za da ñ_a de ya hñ_aqui hingui f_adi? O ¿ha gue gatho da za da b_adi da m_a te m_anga nú'_a to'o ñ_a de ya hñ_aqui hingui f_adi? Hina, hinga gatho da za.

³¹ 'Y_øth_u 'nara ts'edi pa da za gui p_e'tsh_u ya mf_adi ne ra ts'edi nú'_u ma'na ya d_angui pa guí p_eph_u Aju_a. Pe nubyá ma ga u't'ah_u hanja grí 'b_uh_u co 'nara hoga'm_ui nú'_a ma'na xá hño de gatho.

13

Ra hm_ate

¹ 'B_u nugui gra ñ_a co 'raya noya xi mahotho, o gra ñ_a ngu 'nara εnxε, pe 'b_u hindí p_e'tsa ra hm_ate, nu'b_ú gra nja ngu 'nara 'bixfani ns_øctho ri 'nohni o ngu 'nara t'εgui ns_øctho z_uni.

² O 'b_u gra p_e'tsa gatho ra ts'edi pa ga m_an_ba rá noya Aju_a, ne gra p_adi gatho nú'_u ya t'øt'e xi xá hñei de rá noya'_a, ne gra p_e'tsa gatho ra mf_adi, ne xi gra p_e'tsa ndunthi ra jamfri asta da za ga japi da mponga 'nara t'øhø, pe 'b_u hindí p_e'tsa ra hm_ate, nu'b_ú hinte rá 'mεcagui.

³ Nehe 'b_u ga umbabi ya hyoya gatho nú'_a dí p_e'tsi, ne asta ga unga ma ndo'yo da ts'at'i, pe nu'b_u hindí p_e'tsa ra hm_ate, nu'b_ú hinte ri muui nú'_a dí øt'e.

4 Nu'a tó'o pɛ'tsa ra hm̄ate, tseta gatho nú'a da 'ñepabi; xi ra hojã'i co yá miq̄u'eiui, ne hini hyøcua nú'a te pɛ'tsi'ũ; hingrá 'ñets'i, ha nixi hini ndangui de ma'ra.

5 Nu'a tó'o pɛ'tsa ra hm̄ate hinto xaxi, hini nsu sehɛ, hingrá cuɛ ne hingui ɛte.

6 Nu'a tó'o pɛ'tsa ra hm̄ate hini johya 'bũ ri nts'oca 'nará miq̄u'eiui, ngue'a nu'á nzantho ri johya hønse de ra hño.

7 Nu'a tó'o pɛ'tsa ra hm̄ate tseta gatho nú'a t'ø'tuabi, camfri gatho nú'a xá hño, nzantho t'ø'mi de ra hño, ne tseta gatho ya ts'othogui.

8 Nura hm̄ate hinhya'm̄ũ ma da uadi, pe nura mfadi dí pɛ'tshũ pa dí mamfũ rá noya Ajuã, nu'á hã, ma da zø ra pa da 'ñotho. Nehe ma da uadi ra mfadi dí pɛ'tshũ pa xa za stá ñãhũ de ma'ra ya hñãqui hingui fadi. Ne ma da zø ra pa ya hinda 'yøtcãhũ ra 'bedi gatho nú'a ra mfadi dí pɛ'tshũ.

9 Ngue'a 'na tui nú'a stá pãdihũ hangue hinxa za stá mãñhũ gatho nú'a xa mã Ajuã.

10 Pe nu xcrá 'bũhũ co nú'a to'o rá meti ra mfadi, nu'bú hã, ja ma ga pãhũni gatho nú'a hinxa za stá pãhũua.

11 Nú'bũ ndrã notsi ndí ñã ngu ñã ya batsi, ha ndí pɛ'tsa ya mfeni ngu rá mfeni ya batsi, pe ya de ndá ndanga ja'i, ya dá tsopũ nú'a ra 'm̄ui ndí pɛ'tsi dega batsi.

12 Hangue njabũtho nehe numa mfadi dí pɛ'tshũ de guecua ja ra ximhai hini xøgue, nja ngu nú'a to'o ri yot'a rá hmi dega xuui ja ra hñe, pe hini hnequi xá hño. Pe nu xcrá 'bũhũ mahyɛgui co Ajuã, gue'bũ ma xi ga pãhũ xá hño gatho, njabũ ngu xa bacaguihũ xá hño Ajuã.

13 Nura jamfri ne ra hoga nthø'mate ne ra hmāte, guehya ri hñu ma da nja pa nzantho. Pe nu'a ma'na xi ra dangui de gatho, ra hmāte.

14

Ya hñāqui hingui fadi

1 Hangue xi da 'yøth_u 'nara ts'edi pa gui pe'tsh_u ra hmāte, nehe hyoñh_u nú'_u ya mfadi ne ra ts'edi ri unga ra Māca Ndahi. Y de gatho nuya mfadi'_u, ma'na go gui hyoñh_u ra mfadi pa gui manbah_u rá noya Ajuā.

2 Ora ñā 'nara cu de 'nara hñāqui nú'a hingui fadi, padih_u gue nú'a ra cu'a ñā co Ajuā, hingui ñā co yá mija'iuí ngue'a nu'á hingui padi nú'a mañ'a. Nu'á ñā co rá ts'edi ra Māca Ndahi, ne mā de nú'a hingui padi ya ja'i.

3 Pe nura ora manba rá noya Ajuā 'nara cu de rá hñāqui'a, ñā njab_u pa da zofu ya cu, pa da te yá jamfri, ne pa da nupabi yá mfeni, ne pa da hñu'mba yá mui.

4 Nura ora ñā 'nara cu co 'nara hñāqui nú'a hingui fadi, nuse'a ma'na rí te rá jamfri. Pe nu 'nara cu manbabi rá noya Ajuā de rá hñāqui'a, nú'á ri japi ma'na da te yá jamfri gatho ya cu.

5 Nugui ga nehma ga øde gui ñah_u de ma'na ra hñāqui nú'a hingui fadi. Pe ma'na dí ne ga øde gui ñah_u de rá noya Ajuā. Ngue'a nu'a tó'o manba rá noya Ajuā, ma'na ri muui nú'a mā que nú'a to'o ñā co 'nara hñāqui hingui fadi. Xá hño to'o da ñā co 'nara hñāqui hingui fadi, pe nú'b_u di 'bui to'o da 'ra'tsa nú'_u ya noya de nú'a ra hñāqui'a, pa njab_u ma'na da te yá jamfri ya cu.

⁶ Zi cuh_u, nu'b_u nugui ga mab_u pa ga zo'ah_u co 'nara hñ_aqui nú'a hingui pah_u, ¿te 'b_e da za gui pah_u njab_u? Nu'a ma'na xá hño pa gue'ah_u, ga u't'ah_u ngu nú'a xa 'ñutcagui Aju_a, ne ma'ra ya t'øt'e mahyoni gui pah_u, ne ga zo'ah_u de rá noya Aju_a, ne ma'ra ya hoga nt'udi.

⁷ Nuya 'bida ngu ra th_uza o ra arpa, 'b_u hingui z_uni xá hño, nu'b_u ¿hanja da za da f_adi te ma thuhu'a p_ei?

⁸ O nu'b_u ra corneta hinda ñ_a xá hño pa da t'umbabi ra seña ya soldado 'yo ja ra tuhni, ¿ha di ba_adi' _u te ra ora da m_udi da ntuhni?

⁹ Dí njah_ub_u nehe, 'b_u nuj_u hindí ñ_ah_u ngu yá hñ_aqui nú' _u to'o dí zofoh_u, hinda za da ba_adi' _u nú'a te dí mañ_h, ne hinte ri muui nú'a dí mañ_h.

¹⁰ De guecua ja ra ximhai xi ja ndunthi ya hñ_aqui, y cada 'na to'o pa_adi nú' _u ya hñ_aqui' _u, pa_adi xá hño te ma.

¹¹ Nu'b_u nugui ga øde 'nara ja'i da ñ_a de ma'na ra hñ_aqui nú'a hindí pa_adi, nu'b_u pa guequi ga beni gue nú'a ra ja'i'a hingrá mengu, ngue'a hindí pa_adi nú'a ra hñ_aqui gra ñ_a'a. Ne pa gue'a da beni gue hindrá mengu nehe, ngue'a nixi gue'a hingui pa_adi nú'a te dí ma.

¹² Dí pa_adi gue xi guí hoñ_h ya mf_adi ne ra ts'edi nú' _u ri unga ra Ma_aca Nda_hi, hangue 'yøth_u ra ts'edi gui hoñ_h nú' _u ya mf_adi ne ra ts'edi nú' _u da za da japi da te yá jamfri ya cu.

¹³ Hangue nu'a tó'o ñ_a de ma'na ra hñ_aqui nú'a hingui f_adi, dá 'yapabi Aju_a da umbabi ra mf_adi pa da za da 'ra'tsi nú'a ma pa da f_adi te ma.

¹⁴ Nu'b_u nugui dí apabi Aju_a co 'nara hñ_aqui nú'a hindí pa_adi, njab_u dí xøcambeni Aju_a, pe hingui

tsa ma'na dí te ma mfadi ngue'a nixi dí padi nú'a dí ma.

¹⁵ Nu'bú, ¿te da za ga øthu? Da za ga aphu Ajuá co 'nara hñáqui nú'a hindí pahu, pe nehe da za ga apabihu Ajuá co ma hñáquisehehu pa da zo ma mfenihu xá hño nú'a dí mañhu. Ga tutuabihu Ajuá co 'nara hñáqui nú'a hindí pahu, pe nehe ga tutuabihu Ajuá co ma hñáquisehehu pa da zo ma mfenihu xá hño nú'a dí mañhu.

¹⁶ Ngue'a 'bu ga xøcambenihu Ajuá co nuya hñáqui hindí pahu, nu'bú nu'a tó'o hingui øde nuya hñáqui'u hingui tsa da xøcambeni Ajuá mahyεgui con guecju, ngue'a hingui padi te rí bøni nú'a te dí mañhu.

¹⁷ Nu'bu dí xøcambenihu Ajuá njabu, nujú dí mañhu ra hño, pe nu'u tó'o øcaguihu hindí tetuahu yá jamfri ngue'a hingui padi te rí bøni nú'a dí mañhu.

¹⁸ Nugui dí umba njamadi Ajuá ngue'a ma'na dí ña ndunthi que gue'ahu co ya hñáqui nú'u hingui fadi.

¹⁹ Pe de ja ya hmunts'i, ma'na xá hño ga mąnga cut'a ya noya de ma hñáqui pa da fadi te dí ma, pa njabu da za ga utuabi ya cu de rá noya Ajuá, que ga mąnga 'rɛt'a 'mo ya noya de ma'na ra hñáqui hingui fadi ne hinda za da zo yá mfeni ni 'nara noya nú'u ya cu.

²⁰ Zi cuhu, nuri mfenihu odi nja ngu yá mfeni ya bątsi. Njahu ha ngu ya zi bątsi hingui øt'a ya ts'oqui. Pe dá nja ndunthi ri mfenihu ngu rí 'ñep'ahu, ngue'a ya gyá dąnga ja'ihu.

²¹ Ajuá bi zofo ya ja'i de Israel co nuya ya noya xa t'ofu ja ra Maça T'ofu ne ena njaua: “Ma ga

pɛhn'ahubɥ 'raya ja'i hindya mengu pa da zo'ahɥ de ma'na'ño ra hñáqui ngue'a hindri ñá ngu grí ñáhɥ, pe masque njabɥ hingui ma gui 'yøtcaguihɥ ma ts'ofɔ."

²² Hangué nura ora dí ñáhɥ co ya hñáqui hingui fadi, gue'a ngu 'nara nt'udi pa nú'ɥ hinyá gamfri. Pe nura ora dí manbahɥ rá noya Ajuá, dí umfɥ ra ts'ofɔ de rá hmáte Ajuá nú'ɥ to'o camfri, pe nu'ɥ tó'o hingui ne da gamfri, hingui ne nehe da hñanga nú'a ra ts'ofɔ'a.

²³ Nu'bɥ ja ri hmunts'ihɥ gatho'ihɥ guí ñáhɥ co ya hñáqui nú'ɥ hingui fadi, nepɥ da zøhø 'ra nú'ɥ hints'a di patua rá noya Ajuá, o da zøhø 'ra nú'ɥ hindya gamfri, ¿ha gue hinda 'ñena'ɥ gue xcá 'bɛ ri mfenihɥ?

²⁴ Pe nu'bɥ nújɥ dí muntshɥ ne dí manbahɥ rá noya Ajuá ne da zøhø 'na hindra gamfri, o 'na hints'a di patua rá noya Ajuá, nu'bú co nú'a da 'yøde di hmá, da unse nguenda de yá ts'oqui.

²⁵ Nu'bú nú'ɥ ya ja'i'ɥ da badi te gra 'mɥi yá coraso, ne nu'ú 'bestho da ndandiñahmu ne da xøcambeni Ajuá. Nepɥ nu'ú da 'ñeñ'a'ihɥ, xi ma-juani Ajuá 'bɥi con gue'ahɥ.

Beñhɥ gui 'yøthɥ gatho xá hño ngu rí ñehe

²⁶ Nu'bú zi cuhɥ, ¿te da za gui 'yøthɥ ora grí muntshɥ? 'Ra de gue'ahɥ gui tuthɥ ya jahñá, nu ma'ra de gue'ahɥ gui nxahnatehɥ, nu ma'ra de gue'ahɥ gui mañhɥ nú'a xa 'ñu't'ahɥ Ajuá. Nu ma'ra de gue'ahɥ gui ñáhɥ de ya hñáqui nú'ɥ hingui fadi, ha nu ma'ra de gue'ahɥ gui mañhɥ te rí bonga nú'ɥ ya noya'ɥ. 'Yøthɥ gatho pa ma'na da te ri jamfrihɥ.

27 Nu'b_u gui ñah_u de ya hñ_aqui hingui fadi, da za gui ñah_u hõnse yoho o hñu de gue'ah_u, pe 'rama'na gui ñah_u, ne da 'm_uhni 'na nú'a to'o da 'ra'tsi pa da fadi te rí bõnga nú'u ya noya'u.

28 Y nu'b_u di jo'oni to'o da 'ra'tsa nú'u ya noya'u, nu'b_u nú'u to'o ne da ñ_a de 'nara hñ_aqui hingui fadi, odi ñ_a ja ra hmunts'i, ma'na xá hño dá ñ_aseui Aju_a.

29 Y nú'u to'o manbabi rá noya Aju_a, dá ñ_a hõnse yoho o hñu, y nú'u to'o øde nú'a te mañ'u, dá hñuxa nt'øde xá hño pa da ba_di ua gue'a_a ma_a o hina.

30 O nu'b_u 'nara cu manbabi rá noya Aju_a, ne 'b_u Aju_a da umbabi ra mfadi ma'na ra cu di 'b_uhni, nu'b_u, nú'a to'o mi ñ_a ra m_udi, ya odi sigui da ñ_a, pa njab_u da za da ñ_a nehe nú'a ma'na ra cu.

31 Nu'u tó'o xa t'umba ra mfadi pa da manbabi rá noya Aju_a, da za da manbabi, hõnse gue 'rama'na da ñ_a h_a, pa njab_u gatho nú'u ya cu di øde da za da batua xá hño rá noya Aju_a, ne ma'na da za da te yá jamfri.

32 Nu'a tó'o manba rá noya Aju_a, go pa_dise ua rí 'ñepi da ñ_a o hina.

33 Ngue'a_a Aju_a ri ho ga øth_u ma hmunts'ih_u ngu rí 'ñehe, ne di o rá 'ñu nú'a ga øth_u.

Mahyoni ga øth_u ngu xa nzai øt'a ja yá hmunts'i gatho nú'u ma'ra ya cu.

34 Oguí hopabih_u ya 'behñ_a da 'mai ne da manba rá noya Aju_a ja ya hmunts'i, ngue'a_a pa gue'u otho ra nsequi da 'yøt'a njab_u. Dá hñoga'ñøde h_a, ngu m_anga rá ley Aju_a.

35 Nu'b_u ya 'behñ_a ne da 'yøt'a 'nara nt'ani, dá 'yamba yá dame ja yá nguse, ngue'a_a hini hnequi

xá hño 'b_u 'nara 'b_ehñ_a da 'mai ne da ñ_a madetho de ja ra hmunts'i.

³⁶ Benseh_u gue nurá noya Aju_a hingo pa gue'aseh_u, ne hingo ja xa nexp_u pa go gui 'yøt'aseh_u nú'a guí neh_u.

³⁷ Nu'b_u nu'ah_u xi majua_{ni} guí ha_npah_u rá ts'edi ne rá mfa_{di} ra Ma_{ca} Nda_{hi} pa gui ma_nbah_u rá noya Aju_a, nu'b_u ma gui pa_dih_u xá hño gue nuya noya dí op'ah_u go guehya 'raya hmanda xa 'b_epcagui ma Zidadah_u ga xi'ah_u.

³⁸ Pe nu'a tó'o hinda ne da gamfri núna dí ma, nixi gue'a hinda ma da jamfri bi nú'a da ma nehe.

³⁹ Hangue ma zi cu'ih_u, 'yøth_u 'nara ts'edi pa gui ma_nbah_u rá noya Aju_a, ne oguí ha_cuah_u nú'ya ya cu ñ_a de ya hñaqui nú'ya hingui fa_{di}.

⁴⁰ Ne 'yøth_u gatho xá hño ngu rí 'ñehe.

15

Ra Zidada Jesucristo bi yopa nte de ra du

¹ Ha nubyá zi cuh_u, dí ne ga yopa ben'ah_u de nú'a ra ma_{ca} hoga noya ya stá xi'ah_u. Y nu'ah_u xcá hña_nih_u ne xcá camfrih_u xá hño.

² Y po nuna ra hoga noya stá xi'ah_u, ya xcá mpøhøh_u. Hangue sigui gui camfrih_u, gue'a hinda 'm_editho nú'a ri jamfri xcá p_e'tsh_u, gue'a nú'a dá xi'ah_u gue'a majua_{ni}.

³ Nugui dá u't'ah_u ngu nú'a bi t'utcagui nehe. Nú'a ra nt'udi xi ra da_ngui dá u't'ah_u, dá xi'ah_u gue ra Zidada Jesucristo go gue'a bi du pa bi hña_sca ma ts'oquih_u, ngu xqui nt'of_o ja ra Nda_xjua T'of_o gue njab_u mi ma da thogui'a.

⁴ Nehe dá xi'ah_u gue nu'á bi t'agui, pe rá hñupa'a bi yopa nte de ja ra du, ngu xqui nt'ofo nehe.

⁵ Ne 'mefa de ya xqui yopa nte'a de ja ra du, bi nth_uei ra cu Pedro pa bi hyandi. Nep_u 'mefa bi hyanda gatho nú'u ma'ra yá nxadi.

⁶ Y de gue'a, 'na'qui xqui munts'a thogui cat'a nthebe ya cu, y gatho'u bi hyandi nehe'a. Y ndunthi de gue'u tetho asta núbya dí op'a'ih_u, ha nu ma'ra ya xa du.

⁷ Nep_u 'mefa bi hyandi nehe ra zi cu Cobo. Nep_u gatho nú'u ma'ra ya apostol bi hyandi'a.

⁸ Y 'mefa de gatho'u dá handi nehaga, bi hnequi ja ma 'ñu'a, masque nugui ndrí nja ngu 'nara zi ñaxca b_utsi.

⁹ Nú'u ma'ra ya apostol xi ma'na ya dangui yá nsu de guecagui, ngue'a nugui, ni ts'u hiní 'ñepcagui da t'engagui gue drá apostol, ngue'a xi stá ø'tua ra nts'o'm_ui ya gamfri.

¹⁰ Pe nugui dí p_uadi gue Aju_a xi ra dangui rá hm_uate pa guecagui, ngue'a nú'a ra 'm_ui ndí p_u'tsa ma'm_uet'o ya hinga gue'a dí p_u'tsbya. Ngue'a Aju_a bi patca ma 'm_ui ne bi 'racagui 'nara 'ra'yo 'm_ui. Y nú'a bi 'yøt'e con guecagui hinxa 'm_uedit_uho, ngue'a nugui ma'na stá mp_uefi de gue nú'u ma'ra ya apostol. Pe hingo de ma ts'edis_u stá øt'a nú'a ra 'b_uefi'a, nu Aju_a xi ra dangui rá hm_uate con guequi, go gue'a xa 'yøt'a gatho nú'a ra 'b_uefi'a.

¹¹ Nu'b_u nugui dí zo'ah_u o nú'u ma'ra ya apostol, guet'a ra noya dí mañhe mahy_uegi, ne go guet'a xcá camfri_u.

Ma da yopa nte nú'u xa du

12 Nuje stá xi'ahe gue ra Zidada Jesucristo bi yopa nte de ja ra du. Nu'bú, ¿hanja 'ra de gue'ahú guí eñhú gue ya hinda za da yopa nte nú'ú tu?

13 Nu'bú hinda za da yopa nte ma'na'qui nú'ú tu ngu guí mañhú, nu'bú nixi ra Zidada Jesucristo hinxa yopa ntehma 'bú.

14 Y nu'bú hinxa yopa nte ma zi Hmuhú ra Jesucristo, nu'bú hinte dri muuihma nú'a dí u't'ahe, nixi hinte dri muui nú'a xcá camfrihú 'bú.

15 Nu'bú hinda za da yopa nte nú'ú tu, nu'bú hingue majuañi nú'a gra mañmahe de nú'a xa 'yøt'a Ajuá. Nuje dí mañhe nú'a majuañi gue Ajuá bi 'yøt'e pa bi yopa nte ma Zidadahú ra Jesucristo de ja ra du, pe 'bú hinga majuañi gue Ajuá ri japi da yopa nte nú'ú xa du, nu'bú njabú hinxa japi xa yopa ntehma ra Zidada Jesucristo.

16 Nu'bú nú'ú xa du hinda ma da yopa nte, nu'bú nixi nuse ra Zidada Jesucristo hinxa yopa ntehma 'bú.

17 Nu'bú Ajuá hinxa japi xa yopa nte ma zi Hmuhú ra Jesucristo de ja ra du, nu'bú nuri jamfrihú hinte dri muuihma, ne gri duda ri ts'oquihú nehe.

18 Nu'bú di njahmábú, nu'bú gatho nú'ú xa du masque xa gamfri ma zi Hmuhú ra Jesucristo, nu'ú xa 'medihma.

19 Nu'bú nsøtho nú'bya dí tehúua ja ra ximhai dí tømhu ya hño da 'racjú ra Zidada Jesucristo, ne nurá ñoho ra te ya hinte dí tømhu ga hañhú de gue'a, nu'bú nuju xi dyá huecatehú de gatho ya ja'i ngue'a hinte dí tømhu.

20 Pe nu'a xi majuañi, nura Zidada Jesucristo bi yopa nte de ja ra du, ne go gue'a xi rá mēdi bi nuhu

de gatho nú'ᵤ xa du.

21 Po rá ts'oqui 'natho ra 'ñøhø, hangue gatho ya ja'i pɛ'tsi te da du. Pe 'natho ra 'ñøhø nehe nú'ᵤ to'o bi 'yøt'e pa da yopa nte ma'na'qui nú'ᵤ tu.

22 Ngue'a nujá yá b̄atsiguihᵤ ra Adá, hangue dí tuhᵤ nehe ngu bi du'a, ngue'a por nú'a ra ts'oqui bi 'yøt'e'a hangue bi nja ra du. Pe nubya ya drí 'nathohᵤ co ma zi Hmuhᵤ ra Jesucristo, hangue ma ga yopa ntehᵤ nehe ngu bi nja'a.

23 Ma zi Hmuhᵤ ra Jesucristo go gue'a xi rá mudi bi yopa nte de gatho, ngu xqui 'yɛ'mba Ajuá. Nepᵤ nújᵤ stá camfrihᵤ'a, nu stua yopa pengui'a ma ga yopa ntehᵤ nehe 'mɛfa con gatho nú'ᵤ ma'ra xa gamfri. Go gue'a xa 'yɛ'mba Ajuá nehe.

24 Y de gue'a ma da nja ra ngaxhmai, nu sta uadi ma zi Hmuhᵤ ra Jesucristo da huatua yá hmanda gatho nú'ᵤ ri ndá ne gatho yá nsu'ᵤ ne yá ts'edi'ᵤ. Numa zi Hmuhᵤ ra Jesucristo ma da ndá, nepᵤ da yopa 'yɛnt'ua ja rá 'yɛ Ajuá rá Dada ma'na'qui nú'a ra hmanda xqui t'ɛnt'ua ja rá 'yɛ.

25 Ngue'a numa Zidadahᵤ ra Jesucristo pɛ'tsi ma da ndá asta hinda hyandi gue ya xi bi ntate de gatho yá ncontra.

26 Y nu'a rá ngats'i ra ncontra ma dra huati, go gue'a ra du.

27 Ja ra M̄aca T'ofo mā gue Ajuá bi 'yɛnt'ua ja rá 'yɛ ma zi Hmuhᵤ ra Jesucristo gatho nú'a te ja ne nú'ᵤ 'b̄ui nuni mahets'i ne nuua ja ra ximhai. Pe nu habᵤ ena gue gatho bi t'ɛnt'ua ja rá 'yɛ, dí pahᵤ gue Ajuá ra Dada hingui 'b̄ui de ja rá hmanda ma zi Hmuhᵤ ra Jesu, ngue'a nura Dada go xa umbabi ra ts'edi'a.

28 Y nu sta uadi da ntate ra Zidada Jesu de gatho ya hmanda, nu'bú nu'á ma da 'm̄hi nehe ja rá hmanda rá Dada nú'a to'o xa 'yent'ua ja rá 'ye gatho nú'a te ja ne nú'u 'b̄hi, pa njab̄u Ajuá ra Dada go gue'a ma da manda gatho.

29 Nu'b̄u hinda yopa nte nú'u xa du ngu guí mañ̄h̄u, nu'bú ¿pa te ri nxistehe 'ra por nú'u xa du? 'B̄u xi majuani hingui tsa da yopa nte nú'u tu, nu'bú ¿hanja 'ra ri nxistehe por gue'u?

30 Nuje nu'araza ra ora da za ga thamfrihe ga thohē 'nara ts'othogui. Pe nu'b̄u hinda yopa nte nú'u tu, nu'bú hinte ri muui gra 'yohe njab̄u.

31 Nugui xi majuani hyastho thongagui pa da thogui. Dí xi'ah̄u njab̄u zi cuh̄u ngue'a dí padi gue xi guí camfrih̄u xá hño ma zi Hmuh̄u ra Jesucristo.

32 Xi stá ntun'be nuya ts'oja'i de guecua Efeso. Ha nu'b̄u stá øt'a njab̄u pa ma hño se de guecua ja ra ximhai, xi'b̄u xa hyogaguihma, nu'bú ¿te dí tahaga 'b̄u hinda yopa nte nú'u tu? Nu'bú, ma'na xá hño ga ena ngu enga 'ra: “Ma ga ñuñ̄h̄u ne ma ga ntsitheh̄u, cab̄u rixudi ndamani ma ga tuh̄u.”

33 Oxqui hoph̄u to'o da hya'ah̄u, ngue'a nu'a tó'o da ntsixui ya ts'oja'i, da japi da nts'oqui nehe.

34 Xi da p̄e'tsh̄u 'nara hoga mfeni xá hño ngu rí ñehe. 'Yoh̄u xá hño, ogui øth̄u ya ts'oqui. Dí mā njab̄u ngue'a 'ra de gue'ah̄u nixi xcá camfrih̄u Ajuá. Dí xi'ah̄u njaua pa xamā da nja ri tsah̄u de nú'a guí øth̄u.

Hanja ma da yopa nte nú'u xa du

35 Tsa 'ra de gue'ah̄u gui ñeñ̄h̄u: Nú'u xa du, ¿hanja da za da yopa nte? ¿Tengu nú'a ra ndo'yo da me'tsi'u 'b̄u?

36 Pøde nu'ah_u otho ri mfenih_u. ¿Ha gue hinguí pah_u gue nú'a ra nda guí poth_u, mahyoni 'mε't'o da 'ya, nep_u ja da c'onts'a nú'a ra 'ra'yo 'bai gá ndapo?

37 Ora guí poth_u ra trigo o ma'na ra nda, nú'a guí poth_u gue'a 'nara ndatho, pe nu sta c'onts'i ya dra ndapo.

38 Pe nu Ajuá go gue'a ri japi da nte nú'a guí poth_u ne ri umbabi rá 'bai cada 'nara nda ngu nú'a xa 'yε'mbi.

39 Njab_u nehe numa ngøh_u hinga mahyεgui ngu yá ngø ya mbo'ni, y 'na'ño yá ngø ya ts'int's'nehe. Y ya hua 'na'ño nehe yá ngø'u.

40 Njab_u nehe nú'u bí 'b_u mahets'i 'na'ño yá 'bai, ha núju dí 'bah_uua ja ra ximhai 'na'ño ma 'baih_u con gue'u, y 'rama'na'ño yá hotho'u con guesj_u.

41 Nehe nura hyadi 'na'ño rá ñot'i, ha nura zana 'na'ño rá ñot'i nehe. Nehe 'na'ño yá ñot'i ya tsø, ne cada 'na de gue'u 'rama'na'ño gra yot'i'u.

42 Nehe ma ga njah_ub_u nu xcrá yopa nteh_u de ja ra du. Numa ndo'yo dí hah_ubya ma da nt'agui ja ra hai ne da 'ya, pe de gue'a nura ndo'yo'a ma da yopa nte ma'ra'yo y ya hinhya'm_u ma da du.

43 Nubyá hini hnequi xá nsunda nuna ma ndo'yoh_u ma da nt'agui, pe nu sta yopa nte ma'ra'yo ha, ma da hnequi xi strá nsunda. Nuna ma ndo'yoh_u hingui ja rá ts'edi ma da nt'agui, pe nu sta yopa nte ma'ra'yo, ya di ja rá ts'edi.

44 Ma da du nuna ma ndo'yo dí hah_ubya, pe nu xcrá yopa nteh_u ma ga pe'tsh_u ma'na'ño ma ndo'yoh_u. Nubyá dí hah_u nuna ndo'yo ngue'a dí 'bah_uua ja ra ximhai, pe nu xcrá yopa nteh_u ma ga pe'tsh_u ma'na ra ndo'yo ngue'a mā ga 'bah_uni

mahets'i.

⁴⁵ Xa nt'ofu ja ra Maça T'ofu ne ena njaua: Nú'a ra mudi 'ñøhø go gue'a ra Adá, nú'a Ajuá bi umbabi rá te, y 'mefa bi zøhø ma'na ra 'ñøhø mi ngu ra Adá, pe nuse'a umba ra 'ra'yo te ya ja'i, y go gue'a ma Zidadah_u ra Jesucristo.

⁴⁶ 'Met'o bi t'acj_u 'nara ndo'yo de guecua ja ra ximhai, nep_u 'mefa ma dí t'acj_u 'nama 'ra'yo ndo'yoh_u nuni mahets'i.

⁴⁷ Nu'a xi ra mudi 'ñøhø bi 'm_ui, Ajuá bi hyoqui de guecua ja ra ximhai dega hai, ha nu'a rá ñoho ra 'ñøhø bi nja'iua ngu ra Adá, nu'a bá ehe de mahets'i.

⁴⁸ Ngu bi nja ra Adá bi thoqui dega hai nuua ja ra ximhai, necj_u nehe drí nhyaxh_u'a. Ha nura Zidada ra mengu mahets'i, hangue necj_u ma grá menguh_uni ne ma grá hñá'tsua_u rá 'bai'a.

⁴⁹ Njab_u ngu drí hñats'ih_ubya ngu rá 'bai ra Adá xa thoqui dega hai, njab_u nehe ma grá hñats'ih_u ngu rá 'bai ma Zidadah_u nú'a bí 'b_ui mahets'i.

⁵⁰ Dí xi'ah_u zi cuh_u gue hinda za ga cuth_u nuni mahets'i hab_u bí manda Ajuá co nuna ma jih_u ne nuna ma ndo'yoh_u dí hah_ubya. Ngue'a nuna ndo'yo dí hah_ubya ma da nhyai ne hingui tsa da nte pa nzantho.

⁵¹ Nubya ma ga xi'ah_u nú'a bi xica Ajuá ne hincá p_uth_u, gue hinga gatho ya ja'i de ra ximhai ma da du, pe gatho mahyεgui ma dra patca ma 'baih_u.

⁵² Masεtho ma da njab_u, ngu 'na ts'ant'i ma dah_u, nú'a ra ora sta 'bε ra trompeta de Ajuá de rá ngats'i ra ximhai. Nu stí nt'øde nú'a ra trompeta'a gatho nú' _u ya cu xa du ante da yopa 'ñehe ma

Zidadah_u ra Jesu, ma da yopa nte'_u co 'nara 'ra'yo ndo'yo nú'a hinhya'm_u ma da nts'oqui. Y núj_u gra 'bath_uua ja ra ximhai, 'bestho ra ora'a da mpadi ma 'baih_u nehe.

⁵³ Ngue'a mahyoni da mpadi nuna ma ndo'yo dí hah_u ma da nhyai, pa ga pε'tsh_u 'nara ndo'yo nú'a hinhya'm_u da nts'oqui. Ha nuna ma ndo'yo dí hah_u núna ma da du, mahyoni da mpadi co ma'na ra ndo'yo nú'a hinhya'm_u da du.

⁵⁴ Ha nu stí njab_u ma ndo'yoh_u da mpadi co ma'na ra ndo'yo nú'a hinhya'm_u da nts'oqui ne hinhya'm_u da du, nu'bú ma da nja ngu nú'a huxa ja ra Māca T'ofu hab_u ena njaua: “Nura du bi 'bedi ne bi nhuati pa nzantho.”

⁵⁵ Ne ena: “¿Hab_u jabya rá ts'edi ra du? ¿Hab_u jabya gathu nú'a mi øt'e?”

⁵⁶ Ra ts'oqui go gue'a ri jacj_u ga tuh_u, ne ra ndaxjua ley go gue'a ri umba ra ts'edi ra ts'oqui.

⁵⁷ Pe nubyá, ga umf_u njamādi Ajuā ngue'a numa Zidadah_u ra Jesucristo go gue'a bi 'yøt'e pa dá tapabih_u ra du.

⁵⁸ Hangu nubyá, ma zi hmāca cu'ih_u, xi da camfrih_u xá hño con gathu ri mēih_u. Xi da mpefih_u nzantho ja rá 'befi ma Zidadah_u, ngue'a nu'ah_u ya guí pah_u gue hinda ma da 'mēditho gathu nú'a ra 'befi xa 'racju'a pa ga pēfih_u.

16

Ra mfats'i hmunts'i pa ma'ra ya gamfri

¹ Nubyá ma ga xi'ah_u de nú'a ra mfats'i guí muntsh_u pa guí pēmpah_u ya cu me Jerusale. 'Yøth_u nehe ngu nú'a stá 'bēpa ya cu me Galacia da 'yøt'e.

² Tat'a domingo cada 'na de gue'ah_u 'uecju 'na tui nú'a xá taha_u, ngu nú'a rá ndunthi bi 'ra'ah_u Ajuá. Ne gui ha_xh_u ja ra nija pa ja da hmunts'ini, pa njab_u nu xcrá mab_u hingue ja ra ora'a gui munts'a ri mfats'ih_u.

³ Ne de ante ga mab_u, dí ne gui huanh_u 'raya cu pa nu xcrá tsømb_u ga umbabi'_u 'nara he'mi pa da hñá'tsua nú'_u ya cu me Jerusale nú'_u to'o ma dua ts'ocua nú'a ra mfats'i'a.

⁴ Ha nu'b_u ga handi gue xá hño ga ma nehe, ga me'be'_u.

Ra apostol Pablo ri hñoqui pa da ma dua c'a'tsa ya gamfri

⁵ Stá beni nehe ga ma ga c'a'tsa ya cu nuni Macedonia, hangue 'met'o ma ga 'rani de guehni.

⁶ Stá beni ga 'bui con gue'ah_u ndunthi ya pa, y 'b_u da zahma, ga 'bui con gue'ah_u asta hinda thogui ya pa de ya tsε, nep_u de gue'a da za gui faxcah_u ne gui nexcaguih_u nu hab_u grá ma.

⁷ Núbya xcrá mab_u, hindí ne hønse ga hant'a'ih_u ne 'bestho ga thogui. Nu'a dí ne, ga 'bui con gue'ah_u 'raya pa 'b_u njab_u rá paha ra Zidada.

⁸ Pe ma ga cohi de guecua Efeso asta da zø ra pa de ra Pentecosté.

⁹ Ngue'a nu de guecua xi xa xogui ya gosthi pa ga manbabi rá noya Ajuá, ne ndunthi ya xa gamfri. Pe nehe 'bui ndunthi ya ncontra.

¹⁰ Ne nu'a dí xi'ah_u, nu sta zømb_u ra cu Timu, suh_u xá hño pa da 'mui te rá 'ñenthó ne hinda du rá mui, ngue'a ne'a pεpabi Ajuá ngu dí pεpabi nehe.

¹¹ Hangue por gue'a oxqui ma grí 'ñenithoh_u de gue'a. Y nu stua pengui'a, bá nets'ih_u co ra johya

pa da 'ñe da c'ascagui ma'na'qui, ngue'a nugui dí tø'mi da zøhø'a co nú'ɥ ma'ra ya cu ma dua 'ñoui.

¹² Ha nura zi cu Polo xi stá bantebi da mabɥ ne da mɛui núyɥ ma'ra ya cu dua tsøñ'ahɥ. Pe hinxa ne xa mabɥ. Bi xiqui gue ma da mabɥ da c'a'ts'ahɥ nú'a ra pa'a da nja rá luga.

Ra nzenjua pɛhna ra apostol Pablo mi uadi ra carta

¹³ Xi da nsuhɥ de yá ts'o'bɛfi ra ts'ondahi, ne xi da pɛ'tshɥ 'nara jamfri. Oxqui tsuhɥ nú'ɥ to'o ri ɯtsa'ihɥ, 'yøthɥ ra ts'edi pa gui 'yøthɥ nú'a xá hño.

¹⁴ Gatho nú'a gui 'yøthɥ, 'yøthɥ co ra hmäte.

¹⁵ Zi cuhɥ, ya gui pahɥ gue nura zi cu Teba ne con gatho yá ja'i de rá ngu, go gue'ɥ xi ya mudi gamfri de guepɥ Acaya. Ne gui pahɥ gue nú'ɥ de yá pahasɛ xa 'mɥi pa da maxa ya cu.

¹⁶ Dí bante'ihɥ gui 'yøtehɥ nú'ɥ ya zi cu'ɥ, ne nú'ɥ ma'ra to'o pɛpabi Ajuá ngu'ɥ. 'Yøtehɥ nehe nú'ɥ ma'ra to'o fax'ahɥ ja rá 'bɛfi Ajuá ne gatho nú'ɥ to'o pɛpabi'a.

¹⁷ Xi drí johya ngue'a bi zøhø de guecua ra cu Teba ne ra cu Nato ne ra cu Acaico, ngue'a xa 'yøtcagui nú'a hinxa za xcá øthɥ.

¹⁸ Nuyɥ ya cuyɥ xi bi hñubga ma mɥi ngu xa hñup'a ri mɥihɥ nehe. Numansuhɥ nuya cuyɥ ngue'a go guehyɥ 'rayá hoga mɛfi Ajuá.

¹⁹ Nuya cu de guecua Asia ri fat'ajuá'ihɥ. Nehe ra zi cu Aquila ne ra zi nju Prisila xi pɛhn'ahɥ ndunthi ra nzenjua, nú'ahɥ gui 'bɥhɥ co ra Zidada ngu nja nehe'ɥ. Nehe pɛhn'ahɥ ndunthi ra nzenjua nú'ɥ ya cu ri munts'i ja yá ngu'ɥ.

²⁰ Ne ri fat'ajua'ih_u gatho ya cu de guecua. Ne nzenjuah_u 'na ngu ma'na co 'nara nth_ufi dega hm_ute.

²¹ Nugui drá Pablo, de ma 'yεε dí op'a'ih_u nuna nzenjua.

²² Nehe dí xi'ah_u, nu'uh tó'o hini ma_udi ma Zidadah_u ra Jesucristo, dá t'equē pa da z_utua rá cue Aju_u. Ra Zidada ya ma da z_uh_u.

²³ Y nubyá, ma Zidadah_u ra Jesucristo da max'a'ih_u.

²⁴ Dí p_uhn'ah_ub_u ma hm_ute de ja rá thuhu ma Zidadah_u ra Jesucristo. Njab_u gue'a.

Ra 'Ra'yo Testamento
New Testament in Otomi, Mezquital (MX:ote:Otomi,
Mezquital)

copyright © 2008 Wycliffe Bible Translators, Inc.

Language: Otomi, Mezquital

Translation by: Wycliffe Bible Translators, Inc.

Otomi, Mezquital

ote

Mexico

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Otomi, Mezquital

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

c6437f19-566b-5232-8b2a-5c88e5a5622b